

## De Patrocleae compositione.

**H**omeri carmina non ex multis et variis poematis composita, sed ad unum sumnum auctorem et artificem referenda esse, a quo omnia tam prudenter et eleganter inter se conformata sint, ut paucis modo quibusdam hic illic omissis versiculis cetera jam paene omnia mirum in modum inter se cohaerere neque diversum variumque sermonis colorem prodere videantur, novissimis his annis diserte et ingeniose contra Lachmannum ejusque assectatores demonstrare conatus est Nitzschius libro, cuius nuper primam partem edidit.<sup>1)</sup> Cui in commentatione<sup>2)</sup>, quam conscripsit de reticentia Homeri, Schoemannus ita assentitur, ut quum universa ejus argumenta spectaverit, paene invitum se iis ad approbationem deduci confiteatur, ubi vero ad singula quaeque descenderit, acquiescere posse neget in illo judicio, sed paene confugiendum sibi esse ad Lachmanni auctoritatem et reliquorum, qui quum firmum et sibi constantem in iisdem carminibus omnino nullum modum vel ordinem reperisse sibi viderentur, in multas illa et minutis easque valde inter se contrarias partes dissoluerunt, ita melius posse et facilius miras quasdam singularum partium repugnantias et sermonis varietatem et discrepantiam expediri tollique existimantes quam observata ea, quae antiquitus tradita est, compositione, praesertim quae ne certis quidem et exploratis veterum testimoniis niteretur.

Ac mihi quidem egregium Nitzschii librum perlegenti simile quiddam accidisse libere confiteor, ut quo paratiore et promptiore animo in universam ejus sententiam abire vellem, eo graviores mihi et acriores scrupuli denuo injicerentur. Atque ipsum Schoemannum, quae est mira hujus viri doctrina consilique sagacitas, paucis quidem, sed quae vix refutari posse videantur, rationibus ea quae sibi proposuerat, ita confirmavisse puto, ut equidem non dubitem, quin in omnibus Iliacis libris multa etiam nunc variorum carminum vestigia expressa cernantur. Itaque data hac scribendi facultate, quae in Patroclea iterum et saepius perlustrata me offendissent, ea partim ab aliis animadversa retractare partim neglecta, quantulacunque essent, colligere, et num quid inde de universo Patrocleae contextu formaque primaria conjici posset, paulo diligentius perscrutari constitui. Neque vero, quibus circumscripta est omnis quaestio mea angustioribus finibus, ut causam universam illam, in qua tot et tam docti viri elaboravere, persequerer, animum induxi, sed relicta quam primum tam lubrica et impedita via aequa et tuta petere malo quam ardua et periculosa, hoc unum comprobare satis habiturus, plures inesse easque graviores quam fortasse putentur, etiam in Patroclea iniquitates, quibus nisi recisis aut explanatis non possint sane et continuo inter se reliqua copulari. Quae res modo demonstretur, cetera jam minime curo, si quis Nitzschii rationem secutus additamenta talia et interpolationes nihil prorsus valere existimet ad unitatem carminum Homericorum evellendam, quippe quae multa complecti supervacanea et parum ferenda haud facile quisquam negaverit. Neque minus et ipsam hanc item doctiori judici decernendam relinquo, num Hermanno aliisque post eum auctoribus fuisse parvam quandam Iliadem principale carmen et primarium existendum sit, quod temporum progressu paulatim a rhapsodis et diasceuastis modo additis versibus singulis modo

1) Nitzsch, die Sagenpoesie der Griechen kritisch dargestellt. Die homerische Kunstepopoe in nationaler Theorie. Braunschweig 1852.

2) Index scholarum in universitate literaria Gryphisvaldensi per semestre hibernum a. 1853—54 habendarum.

totis carminibus insertis et interjectis ad hanc nostram tanti circuitus magnitudinem aucta et producta sit, an cum Lachmanno faciendum et minutorum, quae investigasse sibi videtur, carminum ratio<sup>3)</sup>) agnoscenda sit. Neque profecto inter utramque rationem tantum intercedere puto, quantum primo obtutu videri possit, quantumque viri nonnulli docti judicavere. Quamvis enim unam fuisse minorem Iliadem jam antiquissimis temporibus ab uno, quisquis ille fuit, Homero conditam concesseris, hoc tamen nihilo minus confitendum erit, eam, quae ad nostram aetatem tradita est, Iliadem non paucis modo quibusdam et exiguis, qui faciliter dignoscantur, locis et versibus a rhapsodis adornatam, sed totis etiam sive carminibus sive carminum particulibus passim auctam esse, et ita quidem auctam, ut de totius Iliadis ejus summa proba et incorrupta paene nihil jam supersit praeter communem illam fabulam in Graecorum ore propagatam de ira Achillis et altercatione cum Agamemnone. Contra substructum esse omnibus Iliacis carminibus velut unum popularis famae fundamentum partes vel maxime inter se disjunctas dissolutasque continens ne ii quidem insitabuntur, qui summa voluntate Lachmannum secuti Iliadem omnem in XVIII vel etiam plura singula carmina distribuunt.

Quae quum ita sint, facere tamen non possum, ut tertiam quandam opinionem in medio positam, qua non mediocriter commotus sum, plane intactam relinquam. Grotius enim<sup>4)</sup>), cuius nuperime strenuus exstitit inter nos vindex Friedlaender<sup>5)</sup>), in historia Graeca pari prope a Nitzschio et Lachmanno intervallo remotus Odysseam quidem poema esse docet unum et simplex et, quoad fieri potuerit per tam immensam temporum diuturnitatem, per omnes fere numeros perfectum, Iliadem contra in duo potissimum poemata dividit, unam Achilleidem, libris I, VIII, IX, sequentibus, quae mala ex Achillis ira quantaque calamitates acciderint, narrantem, alteram minorem neque vero minoris faciendam Iliadem, quae nullo fere praeter communem illam belli Trojani fabulam cum Achilleide conjuncta vinculo libris II—VII aliam prorsus ejus expeditionis partem comprehendat. Quae poemata quum ratione non plane emendata et probabili multo jam ante Pisistrati aetatem conglutinata sint, hanc nostram exstitisse Iliadem, cuius quae parum inter se partes convenient, ita facile et explicari et defendi possint.

Ne multa, omnis fere causa huc videtur reduci posse, ut quaeratur, num carminum Homericorum natura illa simplex et una populari quadam ratione nitatur in Graecorum mentibus facta et concepta, ex quo velut communis fonte tanta inter omnia, quae eo pertineant, similitudo intercesserit, ut quamvis multa diversae originis vestigia vel ad nostram memoriam proderentur, summa tamen argumenti haud difficulter uno quasi poematum corpore comprehenderetur, an fieri potuisse censeamus, ut tam divini carminis summa et copia tam antiquis praesertim temporibus unius vel maximi poetae ingenio conciperetur et ita conciperetur, ut ratio popularis illa, de qua tam multa tamque egregia Nitzschius, non ex universa modo ipsius populi indole ad poetarum redundaret, verum etiam ab hoc recepta in perpetuum propagaretur.

Ita praemissis iis, quae necessario videbantur dicenda esse, jam ad ipsam rem propositam aggrediamur. Sed quum de Patroclea loquor, non eum modo, qui vulgo ita inscribitur, Iliadis librum XVI hoc nomine intellectum volo, sed una comprehensum etiam librum XVII et XVIII partem priorem usque ad v. 368, ubi occisi Patrocli corpus multis et acerrimis jactatum certaminibus tandem ipsius Achillis opera interposita servatum ad Myrmidonum tabernacula deducitur. Ac licuisse quidem hoc nobis facere, vix quisquam infitias ibit, quum in tanta Homericorum poematum copia vituperatione vacare videatur, si quis unam quamlibet partem in se ipsa conclusam et definitam, de qua accuratius ageret, delegerit. Et ipse Lachmannus in quaestionibus Homericis librum XVII a XVI separari posse negat, cuius argumentum cum illo tam arcte cohaereat, ut aut ab eodem, qui librum XVI vel quod investigasse sibi videtur carmen XV composuerit, auctore hoc carmen perfectum esse oporteat, aut certe ab imitatore quam proxime illius exemplum secuto<sup>6)</sup>). Cui quo lubenter assentior, eo aegrius persuadere mihi possum, libri XVIII initium, ut idem<sup>7)</sup> vult, a Patroclea secernendum esse;

3) Betrachtungen über Homer's Ilias von Karl Lachmann. Mit Zusätzen von Moriz Haupt. Berlin 1847.

4) G. Grote history of Greece. Deutsch von Dr. Meissner. Leipzig 1850.

5) Die homerische Kritik von Wolf bis Grote. Von Dr. Ludwig Friedlaender. Berlin 1853.

6) Lachmann Betrachtungen cet. pag. 74.

7) Betrachtungen cet. p. 79.

nam hoc demum libro omnia, quae jam libris XVI et XVII aguntur, ad finem perducuntur, atque cujus herois laudes virtutesque canat, ejus corpus in medio poetam reliquise certamine, vix credibile est. — Ex contrario Lachmannus finem etiam libri XV inde a versu 592 carmini suo XV addit, sed qua causa id fecerit, in incerto reliquit. Mihi quidem libri XV extrema pars melius videtur cum reliquo libro XV conjungi posse neque ulla necessitas cogere ad ipsum librum XV hoc loco dirimendum. Si unum esse Patrocleam caram per se ipsum finitum constat, aptius profecto est hoc caram ab ipso heroe ordiri, quem celebraturus poeta est. Contra in fine libri XV tristis et misera describit Achivorum conditio, certa jam victoria Hectoris et Trojanorum, quibus acerrime instantibus terga vertere illi et ad naves confugere coguntur. At caedes ista Achivorum ex universa fabula satis superque nota est, eademque, ita ut in nostro carmine fieri oportebat, brevi et succincta oratione atque ad principem carminis heroem evidentissime spectans libri XVI v. 102—124 narratur et in Achillis Patroclique colloquio ibid. 22—45 et 66—79 ita commemoratur, ut nemini dubium sit, quo in discrimine acies versetur. Atque adeo ne aptum quidem hujus carminis esse principium contendeo, si repetatur a libri XV v. 592, ubi nec proelii status nec Jovis consilia clare et dilucide proponantur: Trojani enim leonibus similes naves aggrediuntur, at satis procul eos etiamtum a navibus remotos esse paulo post elucet, quippe qui versu demum 653 dicantur in navium conspectum venisse; Jovis consilium paulo longius explicatur tum demum conservatis navibus salutem Achivis et Trojanorum propulsationem (*παλλωξιν*) se praebitum minantis, quum Hector ignem jam navibus injecerit; at nihil istic de Patroclo auxilio Achivis ab Achille missa, quod si hoc loco reticeretur, cui bono omne Jovis consilium? Quodsi hoc modo rem gerere vellet poeta, melius, opinor, ita caram instituisse, ut convocata deorum concione superis consilium proponeret, id quod libri VIII initio et aliis permultis locis factum videmus. Cognita jam deorum voluntate excipere poterat caedes atque pernicies Achivorum, unde ad Achillis Patroclique colloquium facillima erat transitio. — Sed videtur poeta noster, ut in Diomedea factum est, neglectis omnibus expositionis artificiis etiam simplicius nos in medias herois sui laudes inducere voluisse; nam primum hujus libri versum

*ώς οἱ μὲν περὶ τῆς ἐνσέλμοιο μάχοντο*

non vere et proprie ad librum XVI pertinere, sed ad hunc cum antecedenti conjungendum insertum esse, vix est, quod demonstrandum sit. — Accedit ad nostram de Patrocleae initio opinionem sustentandam, quod Achivorum ea, quae inde a v. 102 describitur, conditio, ut infra videbimus, multis rebus vehementer abhorret a libri XV narratione: quam discrepantiam quum non possit Lachmannus nisi deletis quibusdam versibus dissolvere, nos facile feremus.

Universum autem caram in duas potissimum partes dividitur, quarum una, quae libro XVI continetur, res a vivo Patroclo gestas, altera libro XVII et XVIII initio certamina de interficti illius corpore commissa complectitur. Ac priorem illam quidem quamvis strictim insipientibus facile intelligere licet, majore in se concinnitate rerumque convenientia uti; omnia vero secundo profluere cursu ne ii quidem persuadere sibi potuerunt, qui quam maxime Iliacorum carminum unitatem et cohaerentiam defenderunt. Itaque jam in primis hujus libri versibus ab interpretibus gravis quaedam repugnantia animadversa est, quam, quum satis de ea actum sit ab aliis quumque abhorreat paulum a nostro proposito, quippe quae minus ad ipsum nostrum caram quam ad eam, quae inter hoc et cetera carmina Homericam intercedat, conditionem spectet, ne omnino neglexisse videamur, leviter tantum et breviter attingemus. Missum enim esse ab Achille Patroclum constat, ut, quae gererentur in proelio, percontaretur sibique renuntiaret. Cujus missionis hic mentio nulla; contra quum flentem videat, quasi admirationis plenus quaerit Achilles ex amico, quae tantae sit causa tristitiae: num forte suo vel ipsius patri mala domi acciderint, an, id quod velut cunctanter addit, tantopere ipsi Achivorum cordi sit calamitas, ita ut non videatur, num Achivis mala evenierint, Achilles quaerere, sed num de ista calamitate satis jam sibi cognita et comperta queratur. Quae repugnantia expediri quidem ita potest, ut misericordia commotus Achilles non jam, quid dicturus sit Patroclus, exspectare, sed statim, quae causa sit lacrymarum, interrogare existimetur. Ac profecto in eo non inesse concedo, quo quis offendatur; tamen qui tot verbis domone malos nuntios acceperit, quaerere possit, equidem non video. Et morari quidem Achillem de industria et vereri Achivorum fortunam Patroclum interrogare itaque ad alia quaelibet se convertere etiam per se minus probabilia, modo ne sua mens in dubitationem adducatur, utrum auxilium sit ferendum, an odium

retinendum, simulare igitur mirationem illam et loquendi ambagibus, ut amicum quoque a consiliis abducat, rem extrahere, ea licet omnia ab humani quidem animi natura non aliena fuerint, parum tamen, opinor, Achillis animo, qui simplex est et minime subdolus, accommodata sunt. Accedit, ut nihil Patroclus miretur, quod ille, quo se consilio ad exercitum miserit, oblitus sit. Quare quum ne in reliquis quidem, ubi id fortasse exspectaveris, Patrocleae partibus ulla missi ab Achille Patroclii commemoratio deprehendatur, missis jam talium et similium rationum argutiis hoc teneamus, aut ignorare Patrocleae poetam hanc antecedentium carminum narrationem aut negligere ut parum suo consilio convenientem.

V. 71 — 73 in suspicionem vocavit Nitzschius<sup>8)</sup>: nam quum in libro IX per legationem Achilli Agamemnon de omnibus injuriis libenter se satisfactum pollicitus esset, neque Briseidem modo redditum, sed multa etiam et majora dona additum, non potuisse fieri, ut hoc loco Achilles de regis, qui in gratiam secum redire nollet, iniquitate tam acerbe quereretur. Itaque quum profici nihil, si v. 73 ἀξια vel ἀρθμα pro ἡπτια εἰδεῖν scriberetur, bene intelligeret, non illos modo versus, sed totum locum a v. 69 usque ad v. 79 ut subditivum delendum et pro ἀλλὰ καὶ ὡς v. 80 ἀλλ᾽ ἄγε δῆ scribendum censuit. At ego cum Schoemann<sup>9)</sup> puto ad tutandam totius Iliadis unitatem suspectum illi locum fuisse, in quo nihil insit offensionis; nam quod aperte hoc loco ad libri IX legationem referatur, nihil invenio. Ipsis v. 60—63, etiamsi dubites, quod facilimum est, v. 61 ἔφη γε cum Schoemann de tacita cogitatione dictum putare, non tamen necessario ad librum IX potius respicitur quam ad universam de Achillis ira fabulam, quam non prius depositurus fuisse traditur, quam ad suas naves venisset belli strepitus. Quibus positis nihil jam est, cur miremur, quod Achilles sibi irasci etiam tum regem existimet neque velle petenti sibi satis facere. Neque saniores profecto quam illi versus, si Nitzschium sequamur, v. 85 et 86 videri possunt, quibus diserte Achilles sperare se dicit, lati auxiliis mercedem Achivos et virginem remissuros et pulchra dona (*ἀγλαὰ δῶρα*) adjecturos esse, unde procul dubio, opinor, conjici potest, nulla dum ab Agamemnone dona oblata esse. Jam vero quod longius Achilles, quam fieri opus erat, tristem Achivorum conditionem exponit, ne id quidem supervacaneum aut alienum a poetae consilio est. Laetus enim fingitur Achilles Achivorum miseriis, quae quum sua opera destitutos invalidos illos esse demonstrent tum audivisse Jovem suas Thetidisque preces et promissa praestitisse certissimo documento sint. Neque vero obscure in ipsis illis versibus 69 — 79 jactatio quaedam Achillis Agamemnonisque irrisio cognoscitur, quod viri, in quibus summam spem rex posuerat, nobilissimi jam vulneribus defatigati et ab acie procul remoti nihil ei opitulari possint quodque ipsam regis vocem suos ad fortitudinem incitantis non jam audiat. Atque ne hoc quidem omittendum est, quod, quo miserabilior sit Achivorum calamitas, eo majorem sperat suam futuram esse, si tantas difficultates superaverit, gloriam, et quo luctulentius Agamemnon cognoverit ἦν ἄττη, δέ τ' ἀριστον Αχαιῶν οὐδὲν ἔπιστεν v. 274, eo majoribus laudibus honoribusque suum nomen elatum iri. Honorem autem istum suum majori Achilli curae esse quam ut adjuventur Achivi, et ipse confitetur Nitzschius et v. 84 perspicuum est. Ita ne in v. 80 quidem quicquam mutandum est, sed egregie se habet vulgatum illud ἀλλὰ καὶ ὡς: quamvis magnae, inquit Achilles, illae difficultates sint, quibus occurres, tamen ad bellum te confer; nam quo difficilius auxilium, eo maiores et tui et mei honores erunt.

Alia difficultas, quae in initio libri XVI occurrit, missa ista carminum inter se convenientia, et ipsa facile solvitur. Apertum enim est primo quoque obtutu, eam, quae versibus 102—124 refertur, supremi Achivorum laboris descriptionem non omnino cum illis, quae libri XV v. 674—746 narrantur, congruere. Hoc enim loco Ajax Telamonius cum animi quadam desperatione ultimum jam navibus auxilium latus quoque versus hastam ingentem vibrat, aggredientes multos ad inferos demittit nec loco cedere vult, dum Jovis consilio adjutus Hector prospero iectu illius telum perfringit. Quo facto heros ingens cognita fortuna deorumque voluntate obstupefactus horret, recedit a navi eo usque defensa, Hectorem ignem in eam injicere patitur. Ao primo quidem, id quod jam Lachmannus p. 68 animadvertisit, idem versus 102 repetitur, qui jam libri XV. v. 727 legitur:

*Δίας δὲ οὐκέτι ἔμμυνε· βιάζετο γὰρ βελεσσον.*

8) Nitzschius p. 180—182.

9) p. 13—15.

Famen vero si jam illo superiore loco eo reductus erat Ajax, ut sustinere telorum impetum non posset, qui poterat usque ad hoc tempus tam diu Hectori resistere? Simillima certe utroque loco pugnae est conditio: illuc de navi Protesilai agitur, hic quamquam aperte Protesilai navis non commemoratur, de navi tamen certamen fit, quam, ut supra, defendit Ajax, aggreditur Hector; illuc navis aplustria manu comprehendit Hector ignemque ferri jubet, cuius imperio, ut v. 731 liquet, a Trojanis obtemperatur, hic eadem omnia fiunt, postquam fracta hasta Ajax salute desperata a navi recessit. Insunt etiam in ipsa libri XV narratione quaedam repugnantiae, quas Lachmannus p. 69 solvisse se confidit recisis v. 727—732 et in unum coactis. Cui an assentendum sit, nescio jam ea causa, quod v. 730 Ajax, qui supra v. 677 contum navalem ferro praefixum duorum et viginti pedum manibus gestare traditur, idem non jam contum, sed hastam gerit. At manet ista difficultas, nam eadem hasta occurrit in libri XVI v. 114; accedunt etiam aliae, quas vix effugere poterimus, nisi recesserimus a Lachmanni sententia libri XV finem Patrocleae esse initium arbitrantis, quem seculi tantas discrepantias tam parvulo interposito intervallo nullo modo feremus. Nam ut omittam, hasta hoc loco Ajacem uti, ne hoc quidem extra dubitationem est, utrum in navi, ut libro XV, insistens aut ab una in alteram saliens dimicet Ajax an pro navibus hosti se opponat. Imo vero, ex iis, quae deinceps narrantur, jure vel contrarium conjici licet. V. enim 114 Hector proxime ad eum accedit gladioque ejus hastam percutit: quod qui fieri poterat, si in navi ille insisteret et, ut libri XV v. 727—732 dictum est, paulo a navis aplustribus esset remotior? Ita vero ipsum Hectorem navem concendisse oportebat, quod factum esse nec narratur, et quum ignem ei injici jubeat, quo pacto credibile videtur? Alio modo omnino fieri non poterat, ut ad navem et Ajacem proprius accederet, quippe qui secundum libri XV v. 716—717 puppim jam manu teneret itaque quam proxime esset aggressus. Quid porro consilii poetae fuisse putemus, cur extremo libro XV subito proelii descriptionem interrumperet, neicum finito, ad quod transierat, Achillis Patroclique colloquio ad illam reverteretur idque ita, ut nihil novi adderet? Si quanto in discrimine res versaretur, ostendere vellet, certe in secunda descriptionis parte actionis aliquam progressionem cognosci oportebat; festinare quoque debebat Patroclus tam praesenti conspecto periculo, ut omnem salutem in celeritate positam esse appareret. At is, quasi suspensos tenere vellet poeta et excruciare animos, summa paene securitate aciem instruit, arma induit, ordines perlustrat, milites alloquitur, tum demum proficiscitur. Itaque qui Lachmannum sequitur, ei nihil reliquum esse puto, nisi ut omnem locum a v. 101—129 velut interpolatum recidat; nam si versum 100 aut (quoniam v. 97—100 procul dubio a malo interpolatore inserti sunt) versum 96 continuo v. 130 excipiat, nihil omnino desiderari manifestum est. At mihi videtur loco nostro nec repetita nec continuata superioris certaminis narratio esse. Digressio ista, si ita appellanda est, non solum aptissime et pulcherrime, sed etiam necessario a Patrocleae poeta hoc loco inserta est: ita enim conspecto, non auditu navis incendio (tam prope instare periculum ne ipse quidem Patroclus videtur scivisse, quippe qui propulsos quidem et ad mare conjectos Achivos, neque vero Hectorem jam ignem navibus immisisse tradiderit v. 24, 45, cf. 67, 81) jam ipse Achilles vereri coepit, ne combustis navibus salutis spes omnis rescindatur, jamque, qui paulo ante vi Patrocli precibus commoveri se passus erat, ipse illum ad festinandum incitat. Una tamen nihilo minus restat difficultas. Ajax enim cessisse nec sustinuisse Trojanorum impetum jam v. 102 narratur; tamen tantum abest, ut fugerit, ut versibus sequentibus eodem eum quo antea animo defendisse naves legamus et submovisse ab iis Trojanorum aciem; quin etiam ne restitisse quidem ei Trojanos comperimus, de quibus v. 107—108:

*οὐδὲ ἐδύνατο*

*ἀμφὶ αὐτῷ πελεμέσαι ἐρείδοντες βελέεσσιν.*

V. Demum 122 re vera recedit heros hasta, ut supra demonstratum est, fracta, ad quam rem velut atrocissimam et inauditam v. 112 et 113 ipsae Musae invocantur. At ea me minime movent. Cur enim poeta, quae paulo post accuratius expositurus esset, non jam antea brevi comprehendenter et tamquam praediceret?

Immerito Lachmannus<sup>10)</sup> impugnat v. 273 et 274, quos a Patroclo opem Achivis laturo minus apte pronunciari putat, quam ab Achille I, 411 interitum Achivorum a Jove precante. At jam supra ad v. 84 vidi mus multo majori curae suum Achilli honorem esse quam sociorum salutem; itaque etiam Patroclus et Myr-

midones omnes id potissimum agunt, ut regem suum in pristinum apud exercitum honorem restituant. Id vero fieri quomodo poterat, nisi prius errorem suum Agamemnon animique stultitiam (*ἀτην*) cognoverat? Itaque equidem de oratione illa Patrocli nihil mutandum arbitror.

Neque magis Lachmann<sup>11)</sup> assentior, pro confessu et explorato putanti v. 283 ex libr. XIV, 507 sumptum esse, quod aperte v. 303 nondum fugisse Trojani dicantur, sed a navibus tantum recessisse. At suspectus ille versus:

*πάπιην δὲ ἔκαστος ὅπῃ φύγοι αἰπὺν ὄλεθρον,*

nondum revera fugam significat, sed terrorem pavoremque viso Patroclo, quem Achillem esse suspectantur, in Trojanorum animis exortum. Neque contemnendus sane successus est, quum vixdum conspecto Patroclo navis, de qua tam diu dimicatum erat, servetur omnesque Achivi ex summo discrimine eripiantur.

Sequitur locus multo sane difficilior: Fusis enim v. 356 et 357 et a navibus rejectis Trojanis Hector cognito jam clavis initio Ajacis, cui etiamtum prudenter ac fortiter resistit, impetum ingenti scuto protectus sustinuisse narratur necdum fugisse, sed tuitus esse strenuos socios. V. 363:

*ἄλλὰ καὶ ὡς ἀνέμυμε, σάω δὲρηγας ἐταίρους.*

Nihilo tamen secius continuo idem v. 367 fugit suosque deserit. Neque tanta consilii mutatio fit gravi aliqua clade accepta; nam nihil interea accedit gravius, sed Trojanorum fuga v. 364—366 cum saevissimae tempestatis strepitu comparatur. Num igitur credibile videtur, heroem fortissimum nulla re memorabili gesta fugisse, praesertim qui praesenti eo usque deorum auxilio uteretur? Atque quo magis mireris, confer illa, quae post Sarpedonis caudem de Hectore narrantur. Patroclus enim quum primo terrore, quem adventus ejus efficerat, a navibus hostes propulsasset, cum Myrmidonibus contra Lycios potissimum intra naves, flumen, murum inclusos<sup>12)</sup> se ipse convertit, pugna cum Hectore et Trojanis, ut jam supra vidimus, Ajaci ejusque sociis relicta. Sequitur singulare cum Sarpedone certamen v. 419—507, totius Patrocleae pars facile pulcherrima. Cadit Sarpedon, succedit in occisi locum Glaucus, qui secundum libri XII v. 387—391 a Teucro vulneratus celeriter ab Apolline curatur et Trojanos cum Hectore, ut Sarpedonis corpus Achivis eripiant, impellit v. 508—547; quo facto proelium inter Trojanos et Hectorem et Achivos Patroclo et Ajacibus ducibus redintegratur, dum superati terga vertunt Trojani v. 656 sequ.

Ibi primo quidem hoc mirum est, quod subito Hector, qui, si v. 367 sequ.

*"Ἔπορα δ' ἵπποι*

*ἐκφερον ὀκνύποδες σὸν τεύχεσι, λεῖπε δὲ λαόν*

*Τρωικόν, οὓς ἀέκοντας ὀρυκτὴ τάφρος ἔοντεν,*

fides habetur, jam trans fossam fugisse cogitandus est, in Trojanorum, quos modo deseruerat, acie apud Polydamantem, Agenorem, Aenean v. 536 deprehenditur. Num igitur interea κατὰ τὸ σιωπόμενον rediit? Facilis ea quidem conjectura, sed quomodo id a poeta silentio praetermitti poterat? An inter superiorum Patrocli et Sarpedonis pugnam et ipsi Trojani fossam trajecerunt? At relictos eos esse ab Hectore supra narratum erat, neque ipsum Glaucum a Lyciis intra fossam et naves interclusis tam procul remotum fuisse interfectique regis et amici corpus deseruisse probabile est, ita sine dubio Achivorum et Patrocli praedam futuram, qui jam v. 507 Sarpedonis curru sine ullo certamine potiti sunt.

Sed nova hoc loco occurrit multo etiam gravior difficultas, qua ad superiorum illam accidente vix dubitaverim, quin hic aliquid parum commode suppositum sit. Glaucus enim tam prope Sarpedonem est, ut vel morientis amici vocem exaudire queat. Qui tandem id cum libr. XII v. 387—391 congruit, qui versus ex parte hic ad verbum repetuntur? Ibi enim in pugna de Achivorum muro commissa sagitta a Teucro vulneratus et, ut a certamine discederet, coactus clam ceteris a muro in campum Trojanum se receperat; scilicet muro nondum expugnato receptus in quem alium locum dabatur? Cujus rei minime ignarus, quippe qui v. 392 vulneratum eum abire vehementer doleret, tamen Sarpedon hoc loco eum, quasi praesens esset et adjuvare se posset, alloquitur. Itaque nisi omne Glauci auxilium subditivum esse volumus, id quod vix quisquam

11) p. 72.

12) cf. v. 395—397.

bono consilio confirmaverit, hoc reliquum est, ut nostrum poetam Glauci vulnerationem ignorare eumque inter ipsos Lycios non procul a Sarpedone pugnantem facere arbitremur<sup>13)</sup>). Omnis igitur mira illa curatio per Apollinem facta v. 509 — 531 suspecta est et eo consilio videtur hic interposita esse, ut cum libro XII. Patroclea congrueret. Quo posito optime versum 508 excipit v. 532 neque quicquam inter eos requiritur.

Neque vero alteram illam offensionem scio, qua ratione solvam, nisi eam quoque Hectoris fugam, de qua supra ad v. 367 — 369 demonstratum est, parum commode illi loco insertam esse conjecteris. Jam enim ipsa tanta ignavia quo modo Hectori condonanda est, quod desertis sociis prius ad fugam se verterit, quam magnum aliquem heroem cecidisse cognovisset? Imo vero fugam, opinor, v. demum 656 sequi. Hector capessit neque ibi fugit desertis Trojanis, sed ut et ipsi fugerent, admonitis:

*Ἐπτορὶ δὲ πρωτίστῳ ἀνάλκιδα Θυμὸν ἐνίκεν·  
ἐς δίφρον δ' ἀναβὰς φύγαδ' ἔτραπε, κέντετο δ' ἄλλον·  
Τρῶας φευγέμενα·*

Optime hic se omnia habent: Juppiter ipse, ut Patroclus ad urbem usque progrederetur, consilium cepit; quare Hector cognita dei voluntate (v. 658 γνῶ γὰρ Λός ιδὲ τάλαντα) etiam Trojanos ad fugam hortator. Illic v. 367 — 369 Hectoris fuga v. antecedentibus 359 — 363 repugnat, hic fato coactus bene heros recedit; illic aduersus unum Ajacem, paulo ante vix sibi parem, ancipiit proelio pugnat, hic jam cum ipso Patroclo et Myrmidonibus conseratis manibus victus abit.

Sed etiam ejctis v. 367 — 369 manet aliqua offensio: v. enim sequentibus — 393 fuga describitur Trojanorum repentina et incondita, qua ipse jam Hector abripitur. Ferri id quidem posse concedo; nam ut remaneat dux fugientibus ceteris et unus Ajaci ceterisque, qui eum sequuntur, viris fortibus resistat, haud facile quisquam postulaverit; tamen jam hoc loco Hectorem omnesque Trojanos in effusam, priusquam aliquid gravius accidisset, fugam conversos esse, aegre persuadere mihi possum. Itaque respectis comparatisque iis, quae pugnam de Sarpedone commissam sequuntur, suspicio mihi quaedam exorta est prava fortasse et nimis audax, quam tamen in medium quin proferam, facere non possum. Fusis enim fugatisque v. 656 — 697 Trojanis nulla sit fossae mentio, apud quam caudem atrocissimam factum iri jure exspectamus, sed quasi nullum jam intercedat impedimentum, ita Trojani fugientes, perseguentes et instantes Achivi ad urbis usque moenia procedunt. At pugnam de Sarpedonis corpore intra fossam et naves accidisse, neminem effugiet, qui considerate carmen perlegerit<sup>14)</sup>). Atque universa hoc loco Trojanorum fuga frigide et parum convenienter, ne dieam inepte describitur, ita ut omnes v. 684 — 697 ad lacunam, quae inter fugam Trojanorum et nova Patrocli certamina inde a v. 698 subsequentia intercedit, explendam insertos esse existimem. Nam paene omnia hic prava et inepta sunt. Ac primos quidem v. 684 et 685

*Πάτροκλος δ' ἵπποισι καὶ Αὐτομέδοντι κελεύσας  
Τρῶας καὶ Λυξίον μετεκίαθε —*

si conferantur cum plena illa atrocissimi certaminis descriptione, jejunos et languidos esse quis non videt? V. vero 685 — 688

*νήπιος· εἰ δὲ ἔπος Πηλημάδος φύλαξεν,  
ἢ τὸν ὑπέκυργε κῆρα κακὴν μέλανος θανάτοιο·  
ἄλλ' αἰεὶ τε Λός κρείσσων νόος ἡρέ περ ἀνδρῶν·*

non minus mihi videntur inepti esse, quam sequentes duo, quos ex libr. XVII v. 177 seq. huc irrepsisse manifestum est. Nam et illi repugnantiam quandam continent. Patroclus enim ut moreretur, fato destinatum erat, ut paulo infra v. 693:

*ὅτε δῆ σε θεοὶ θάνατόνθε κάλεσσαν·*

quo igitur pacto hic dici potest futurum fuisse, ut mortem effugeret, si Achillis praecepsis obtemperasset, quibus ne obtemperaret, ipso deorum consilio provisum erat. Quod abripitur adversa fortuna neque quicquam amici mandata et consilia prosunt, in eo ipso aliquid vel maxime tragicci cernitur. Denique ne v. quidem 692 et 693 ferre possum:

13) Idem Lachmannus judicat p. 72.

14) Cf. in primis v. 394 sequ., qui nullam de ea re dubitationem relinquunt.

*Ἐνθα τίνα πρώτον, τίνα δ' ὕστατον ἔξενάριξας,  
Πατρόκλεις, ὅτε δή σε θεοὶ θάνατόνδε κάλεσσαν;*

Neque enim qui continuo 694 — 697 nominantur, ultimi a Patroclo caeduntur, sed diu etiamtum saevit ille neendum ullus certaminis finis.

Itaque quam supra raptim et improviso ad fossam fugam factam mirati sumus, eam hic vel maxime requirimus. Quare excusabor fortasse, si totam illam fugam 364 — 393 (recisis tamen tribus v. 367 — 369, quoniam Trojanos ab Hectore citra fossam desertos esse ne sic quidem probabile est) ad hunc locum trans tulero. Qua facta transmutatione quanto melius et concinnius omnia procedant, vix quemquam negaturum esse confido. Videtur enim positis illis permutationibus integer et perpetuus harum carminis partium contextus hic fuisse: Patroclus cum Myrmidonibus omnem Trojanorum exercitum aggreditur primoque impetu a navibus repellit; repressis iis et in summum terrorem neendum tamen in apertam fugam conjectis contra Lycios se convertit, quorum regem occidit. Atque egregie quidem cum Hectore nondum congrederitur; nam quum utrique mors nondum destinata sit, bene illi, dum fato Patroclus functus sit, a diis distincentur. Quare dum in ceteros saeviunt Myrmidores, contra Ajacem Hectori pugna relinquitur, adversarium in omni fere Iliade proprium ejus et singularem. Et paulatim quidem recedere coguntur Trojani nec tamen foeda jam dissolutaque fuga fossam trajecerunt. Priusquam enim trajiciunt, a Glauco ad novam de Sarpedonis corpore pugnam evocantur; neque in ea Glauri oratione v. 538 — 547 quicquam inest, ex quo fugisse jam illos conjecteris, imo vero servare etiamtum ordines videntur. Audito tanti ducis interitu ira et miseratione commoti reficiunt animos repressoque pede novam instituunt aciem, ita ut de Sarpedonis corpore ab altera parte Myrmidores et Achivi Patroclu nimirum et Ajace, ab altera Lycii et Trojani et Dardani Glauco, Hectore, Aenea ducibus<sup>15)</sup> vehementissime confligant. Cujus proelii atrocitas vel eo significatur, quod v. 567 et 568, quo saevius fieret certamen, Jupiter tenebras perniciose effudisse dicitur. Idem libro XVII in Patrocli honorem fieri infra videbimus. Postquam diu utrumque acriter dimicatum est, ipsius Jovis consilio Trojani fugam capiunt. Quae Jovis deliberatio huic loco maxime accommodata est: jam enim res in ultimum disserimen vocata erat; nisi enim fugerent Trojani, jam ipsum Patroclum fato nondum expleto mori necesse fuit, neque igitur id quod voluerat, perfecisset poeta, ut non fossam modo Patroclus trajiceret, verum etiam urbis moenia aggrederetur.

Descripta tumultuaria illa fuga plane in hoc libro cetera omnia ad finem percurrunt: A Trojae moenibus, quae quater frustra insana mente ascendere conatur, ab Apolline Patroclus repellitur, de quo in turri Trojana stante infra agemus. Surgit tum denuo Hector ab eodem deo excitatus et adjutus; subsistunt Achivi tanti herois aspectu perterriti; necato Cebrione, Hectoris auriga, novum oritur de illius corpore certamen superiori simillimum, sed pulcre grateque variatum; vincunt tandem vel fato superiores Achivi v. 780 et potiuntur corpore. Iterum saevissime furit Patroclus: ter irruens in hostium aciem ter novem viros occidit, sed quartum impetum furibundo animo faciens mortem occumbit conjunctis Apollinis, Euphorbi, Hectoris viribus. Ita dignissime tanto heroe prior haec Patrocleae pars finitur.

Priusquam vero ad alteram partem transeam, restat, ut de rebus nonnullis loquar supra, ne totius carminis summam interrumperem, omissis. Miror Lachmannum, quibus locis<sup>16)</sup> murum Achivorum in Patroclea commemorari negat, v. 397 neglexisse, quo v. murum castrensem significari manifestum est. An illum Lachmannus urbanum murum intellectum vult? at repugnat recta ejus loci interpretatio. Ac v. quidem 512 cum Lachmanno me ejicere supra dixi, de v. 558 infra exponam. Quartus superest locus libri XVIII v. 215, quo et ipso murus affertur, ita ut dubitatio nulla esse possit, quin erraverit Lachmannus, ignorari murum castrensem in Patroclea et hunc ipsum murum pro documento esse confirmans, librum XVIII a Patroclea separandum esse. Consentio cum Friedlaendero<sup>17)</sup>, qui etiam aliis argumentis falsam Lachmanni esse opinionem ostendit; sed is quoque, quantum video, hunc v. 397 praetermisit.

15) cf. v. 536 et 564.

16) cf. p. 67, 72, 79.

17) Homerische Kritik pag. 82 et 83.

Deorum in Patroclea praeter Jovem Apollinem maxime coli, neminem facile effugiet, quippe qui multo saepius quam ceteri rebus humanis intercedat. Ac duos quidem locos, v. 666 — 683 et 698 — 711, quibus Trojanorum, ut solet, fautor et adjutor ille existit, ejiciendos esse Lachmannus<sup>18)</sup> arbitratur. De quibus ne retractandis et illius et aliorum dubitationibus longus sim, quid sentiam, quam brevissime dicam, praesertim quum aequo fere jure videam de ea re in utramque partem facile disputari posse. Atque inter priorem locum v. 666—683 et Jovis Junonisque colloquium v. 432 — 458 ea ratio intercedit, ut una illi versus aut retinendi aut ejiciendi videantur. Juppiter enim, quum congreidentem cum Patroclo Sarpedonem videat, apud Junonem v. 432 seqq. queritur: dubitare se, utrum Sarpedonem mori jam patiatur an eripiat ex hostis manibus. Cui Juno respondet: fato esse parendum; ceterum, si misereat eum filii, tradat eum Somno Mortique in Lyciam auferendum. Altero loco 666 — 683 occiso Sarpedone jam Apollo a patre ea, quae suaserat Juno, exsequi jubetur. Tanta praeterea utroque loco sermonis similitudo est, ut aut ab eodem eos auctore ortos aut unum alterius imitationem esse facile possit conjici. Cf. v. 454 — 457 et 671 — 675, 668 — 673 et 678 — 683. Ac notum est, hos locos jam Zenodoto suspectos fuisse, qui in scholiis ad v. 432 idcirco reprehendit. At ego Lachmanno assentior ornamenta haec esse judicanti temere fabulae inserta. Recte idem Zenodoti ad v. 666 emendationem *καὶ τότε ἄρδεται Ιδης προσέφη Ζεὺς δὲ γίλον νιόν,* cum scholiis consentiens ineptam existimat; sed cur priorem locum false Zenod. resecuerit, nec dixit ille neque ego video. Ceterum utrumque locum eidem auctori deberi suspicor, qui Glauci precationem considerit; sed latius ea res patet et ad alias quoque quasdam partes pertinet, de quibus v. infra.

Tertium locum v. 698 — 711 sine probabili ratione Lachmannum in suspicionem vocare opinor. Patroclum enim urbis moenia aggressurum, jam ab initio carminis erat consentaneum, quippe quem eo usque progredi Achilles vetaret v. 89 — 92. Qui porro melius poeta herois sui laudes celebrare poterat, quam ita ut per unum Apollinem staret, quominus urbem caperet. Neque magis offendit, quod repulso Patroclo turrim deus relinquit (*vere κατὰ τὸ σωτηρίουν*) Hectorem ad novam pugnam hortaturus. Jure ille ad Scaeras portas quiescens dimicetne an in urbem se recipiat deliberat: nam cessisse eum Patroclo, quem a diis ductum existimaret, vidimus; jam vero quum divina illum vi a moenibus repulsum cognoscat, ipse ab Asio aut, quod divinare facile potest, ab Apolline admoneatur, refecto animo Patroclo audet resistere v. 726 sequ. At v. 94 Apollo proelio interesse cogitatur; qui igitur in turri potest consistere? Evidem vel contrarium ex hoc versu conjecterim. Achilles enim amicum, ne victoriae laetitia abreptus urbem aggrediatur, monet, ne qui deus ipsi aduersetur; nam valde diligi illos ab Apolline. Itaque non apud naves, ubi proelium est, Apollinem esse, sed urbem tutari Achilles suspicatur, quem si apud naves in proelio versari cogitaret, ne ad eas quidem amicum debebat mittere; quid enim obstabat, quin etiam apud eas Patroclo deus occurreret? Eodem jure etiam ceteros omnes deos Trojae adjutores in acie adesse ex v. 93 conjici licet, quoniam iis quoque ut obviam ire vereatur, amico ille praecepit. At non in proelio illi, sed in Olympo versantur, id quod luculenter cernitur ex eodem v. 93: *μή τις ἀπέτι Οὐλύμπιο θεῶν αἰευγενετάων εὐβῆτη.*

quid igitur impedit, quominus Apollinem quoque in Olympo esse statuamus et fusis demum Trojanis interitumque urbi Patroclo minante in turri consistere? praesertim quum ceteri hoc usque loci, quibus Apollo commemoratur, aut insiticii aut dubiae certe auctoritatis sint. Neque vero ut jam antea deum pugnae interfuisse concedam, v. 726 commoveor. Vocabulum enim, quod offendit, *αὐτὸς* facile aut, ut Faesiūs<sup>19)</sup> vult, aut, ut mihi quidem magis placet, hoc modo explicatur: „primo quidem relicta turri ad Hectorem venerat deus, iterum, i. e. converso itinere in proelium se confert.“

Nec meliore jure Lachmannum p. 71 Pedasum, equum mortalem, immortalibus duobus Xantho et Balio additum, in dubitationem vocasse puto. V. enim 381:

*ἄμβοτοι, οὓς Ηγέτη θεοὶ δόσαν ἀγλαὰ δῶρα,*  
qui unus eum ferre non videtur, per errorem ex v. 867 in hunc locum irrepisse manifestum est ipseque

18) pag. 72 et 73.

19) cf. ejus editionem Iliadis.

Lachmannus veteribus testimonis carere confitetur. Atque etiamsi quis versum hunc retinere velit, tamen immortalium tantum hoc loco, neglecto mortali, equorum mentionem factam esse maluerim, quam omnino idcirco funalem equum reprehendi, quo tanti herois currum ornatum esse paene necessarium videatur. Jam vero v. 462 — 476 praeter mirum illud *οὐτασεν* nullam habent offensionem. Quid enim aptius quam ipsum herorum certamen tamquam prolusionem quandam antecedere, ex qua ipsius certaminis eventum divinari liceat, quippe in qua Patroclus Thrasydemum, socium Sarpedonis, Sarpedon mortalem modo Patrocli equum occidat. *οὐτασεν* autem istud, cuius loco ἔβαλεν exspectaveris, recte ego Faesum explicuisse puto, cuius cf. ad hunc locum interpretationem.

Idem mihi, ut non possim cum Lachmanno consentire, accidit in v. 555—562; quos ornamenti causa parum huic loco convenienter insertos esse judicat ille p. 72, quoniam nulla omnino in hoc carmine muri castrensis mentio fiat, et secundum libr. XII v. 438 (adficere poterat XII, 462) non Sarpedon primus, sed Hector murum expugnaverit. At priorem istam Lachmanni de muro opinionem sustineri non posse supra vidimus; et quod cum libro XII nostri carminis narratio non plane congruit, id ipsum argumenti loco est, ab alio auctore Patrocleam ac librum XII ortam esse, id quod quum summa mentis sagacitate demonstrare conetur, hoc loco videtur neglexisse vir egregius. Ceterum recte vidit Faesius, facilime hanc fabulae dissensionem inde potuisse fieri, quod et ipse de muri expugnatione optime Sarpedon meritus sit, cuius potissimum opera adjutus in portas Hector irruerit. cf. libr. XII, 290—293 et 397—399. Atque adeo adhortatio ista Ajacium ceterorumque Achivorum si abesset, certo aliquid hoc loco requireremus. Supra enim Glaucon meminimus, quum interfecto Sarpedone impares Lycios Myrmidonibus esse cognosset, Hectorem et Trojanos male habitos ab Achivis et vexatos auxilio evocasse. Paulo infra ex v. 564 seq. etiam Achivos Ajace duce, quum remotis Trojanis nullos sibi adversarios haberent, ad corpus Sarpedonis retinendum accurrisse videmus. Quid igitur aptius et magis paene necessarium quam, ut Glaucon Hectorem advocaverit, ita Patroclum Ajaces accersere et quo acrius pugnent, verbis alloqui.

Neque denique possum non adversari Lachmanno immerito v. 850 dicenti<sup>20)</sup> Euphorbum Hectori praeferriri. At est profecto causa satis probabilis. Gloriare, inquit Patroclus, quantum voles; nec tamen tu me superasti, sed fatum et Apollo, neque vero homo tu me interfecisti, sed Euphorbus. Quid mirum, quod homini perquam ignobili suae caedis gloriam concedere malit quam Hectori hosti infestissimo? Arctissime morientis Patrocli vox indignabunda cohaeret cum pulcherrima libri sequentis de Euphorbi nece narratione, quam ut abjiciat, haud sane libenter sibi quisquam poterit persuadere.

Majores multo et graviores difficultates in libro XVII nobis occurunt. Cujus pleraque partes tam obiter inter se conjunctae sunt, ut quae vera fuerit carminis primarii compositio, investigare haud sane facile sit. Imo vero primo quidem obtutu nihil fere cognoscere videmur nisi multa et varia certamina ad Patrocli quidem necem cuncta referenda, sed quae multum in se contrarii diversique habeant. Diligentius vero perquirenti et quae verae, quae falsae carminis partes fuerint, perscrutanti multae istae difficultates ita solvuntur, ut constans plane et accuratissimum poetae consilium fuisse luculenter intelligamus.

Atque omnia quidem illa de Patroclo certamina in ingentis magnitudinis molem aucta esse nemo infinitias ibit, qui vel quo tempore gesta illa certamina narrentur, consideraverit. Patroclum enim sub vesperum cecidisse cognoscimus ex lib. XVI v. 777—780, quo uno illius libri loco temporum descriptio facta est. Quod vero etiam Patroclus tribus incursionibus factis ter novem Trojanos caedit, inde certo jam paulum processisse vespertinum tempus consequitur, quamvis ipsam noctem nondum advenisse multis locis appareat. Nihilo minus omnia libri XVII et quae hic spectant libri XVIII certamina eodem vespere evenisse narrantur; nam occidisse sol libri demum XVIII v. 241 refertur. Atque nonnumquam poeta vel vesperascere oblitus videtur esse. Dicit enim primo quidem v. 268 sequ., ut honore afficeretur Patroclus et, ne canum praeda fieret, impediaretur, tum v. 368, circum Patrocli corpus, ubi fortissimi utriusque exercitus viri pugnarent, caliginem a Jove effusam fuisse, quum in reliqua acie sol luceret neque nubes ulla appareret.

20) pag. 73.

*ηέρι γάρ κατέχοντο, μάχης ἐπί Φόσσους ἄριστοι  
ἔστασαν ἀμφὶ Μενούπαδῃ κατατεθησάται,*

et quae sequuntur. Cui rei bene respondet v. 594, ubi nubibus Juppiter Idam circumfundit cum tonitu et fulguribus; hoc tamen differt, quod supra tenebras illas in Patrocli honorem effudit, hic iisdem velut malo omni Achivos perterret. Neque minus v. 644 Ajax Telamonius pae caligine dicit, nimirum portentosa illa et divinitus missa, quae spissa viros equosque obtegat, neminem se posse tota acie conspicere, quem ad Achilem mittat tantae calamitatis nuntium. Idem, ut nebulam discutiat, precatur Jovem, ut in luce certe, si mors sibi destinata sit, perire liceat. Cujus precibus auditis denuo sol illucescit v. 650:

*ἡέλιος δ' ἀπέλαμψε, μάχη δ' ἐπὶ πᾶσα φαύνθη.*

Itaque, quod offertur miraculum, non positum est in sole praeter consuetudinem Jovis jussu lucente, sed plane in contrario, quum uno tantum loco miras illas tenebras exstisset paulo ante diserte expositum sit.<sup>21)</sup>

Tandem libri XVIII v. 214 Junone auctore Iris admonitu Achilles ad fossam, ut aspectu suo hostes deterreat, inermis advolat. Cujus caput nube splendente involutum procul per tenebras cernitur, ut signa, quae noctis tempore in insula deserta conspiciuntur. Hic revera sol occidere coepit, ut et similitudo docet v. 240:

*ἄμα δ' ἡέλιος καταδύνται*

*πυρσοί τε φλεγέθοντις ἐπήρεμοι — —*

et paulo post excipiens illam ipse solis occasus v. 239—241.

Idem est, si perseveramus in antiqua opinione de carminum Homericorum compositione, ille dies, qui jam libri XI initio illuxit: Ac ne tum quidem plane finitus est immensus ejus diei labor: Trojani enim multa jam nocte consultant et Hectoris auctoritate compulsi per noctem sub divo manere constitunt; Achivi, Myrmidones potissimum, mortem Patrocli lugent. Adjicitur colloquium Jovis et Junonis v. 356—368 et ipsum ad Patrocli caudem pertinens. Adde quod jam lib. XI, v. 84—90 meridies ejus diei exsistit. Omnia igitur, quae inde a libri XI, v. 90 usque ad libri XVIII v. 368 narrantur, horis pomeridianis geruntur. At Patrocli certamina totum diem complecti et non multo post solis ortum ordiri jam supra cognovimus, et vel inde apparet, quod in libro XVI denuo meridies exsistit v. 777. Per totum igitur diem pugnatur: sub vesperum cadit Patroclus, sed quum sol nondum occiderit, quid mirum, quod de ejus corpore etiamtum in luce dimicatur!

His de universi libri XVII tempore praemissis, quae partes carmini primario parum convenient, diligentius indagabimus. Atque initium quidem hujus libri ab antecedentis fine differre jam a Lachmanno adversum est. Ibi enim Hector Patroclum occiderat, quem illico armis occisi herois potitum esse exspectaveris; quod ut fiat, tantum abest, ut ad currum Achilleum expugnandum illo converso Euphorbus, qui nec opinato paulo ante vulnere Patroclo prospere inficto anxie trepideque v. 813 in suorum aciem se abdiderat, idem glorians jam et fiduciae plenus in medium prodeat corpus ut suam praedam arrepturus. Nec minus paene videtur offendere, quod primus Menelaus pro corpore propugnat, unde immerito totus hic liber *Μενελάον ἄριστεα* inscribitur. Neque enim quemquam potest effugere, non Menelaum, virum alias haud sane maxime strenuum, sed Ajacem Telamonium, ut antea navium, ita tunc interfecti Patrocli defensorem existere acerrimum, ad quem vulneratis Agamemnone, Diomede, Ulike, spes una paene Achivorum confugerit.<sup>22)</sup> Itaque continuo post occisum Euphorbum fit, quod fieri necesse erat, ut qui jam libri XVI initio Patroclo contra Lycios converso in Hectorem semper hastam direxerat, idem imperfecto illo fortissimo hosti fortissimus occurrat. — Nec tamen tanti istud est, ut cum Lachmanno aliquid hoc loco reprehendere vel desiderare voluerim. Nam Hectore quidem ad rapiendos Achillis equos profecto, Ajace, ut ex omni libro XVI appetat, a Patroclo, tamquam tanti viri propinquitate ne quid de sua laude detraheretur, metueret, paulo remotiore, bene res ita instituta est, ut

21) Errare puto Lachmannum, qui pag. 78 ad Achivorum salutem a Jove istas tenebras effusas esse dicit; nam v. 270—273, ubi latius ea et accuratius exponuntur, ad Patrocli quidem honorem, quo plures utrumque caderent, neque vero ad Achivorum salutem id factum esse narratur. Neque profecto saluti eam nebulam esse Achivis, sed summae perniciei, postea ex v. 643—650 manifestum est. Nam quum unum hoc beneficium a Jove Ajax petat, ut tenebras illas disjiciat, quumque misericordia adductus deus ejus preces audiat, quo modo judicare possumus, ad eosdem servandos et tuendos et obducere Jovem et dissipare caliginem!

22) cf. Nitzsch Sagenpoesie pag. 254, cui hunc XVII librum pugnam de Patrocli corpore appellari postulanti libenter concedo.

alterum Patrocli occisorem Menelaus necaret corpusque idem defenderet, dum majori posset concedere. Lachmannus vero argutias videtur captare: neque enim, id quod exponit ille p. 74, v. 13 et 16 Euphorbus exuere arma, sed capere vult; nec non v. 125 et 187 eadem ratione explicari possunt. Etiamsi vero hoc ita esse negaveris, nihilo tamen magis res inter se repugnant; nam Apollinis ictu non deciderant omnino a Patrocli corpore, sed soluta tantum arma erant: galea decidit a capite v. 793, hasta perfringitur v. 804, clypeus humi cadit v. 803, thorax solvitur needum defrahitur. Itaque in v. 205 nihil offendit praeter unam vocem *χρατός*, quae facile poterat ad *φύσιν* addi, praesertim quum liceat eam hoc modo intelligi: arma, quae in capite et humeris gerebat. Itaque minime, id quod p. 74 Lachmannus proponit, necesse est, aut imitationem libr. XVII non prorsus convenire cum libro XVI, aut libri XVI v. 793—804 et 814—815 et 846 ad ornandum Patrocli interitum insertos esse. Jam quod libri XVI v. 815 et XVII, 422 idem heros *γενύρος* appellatur, nihil inde consequitur nisi inermem eum esse et spoliatum galea, clypeo, hasta. Itaque quod non conveniat cum libro XVI, equidem in libr. XVII initio non reperio.

Occiso Euphorbo tantopere Trojani terrentur, ut pavide recedant et interficti corpus Menelao relinquent. Quare v. 71 denuo procedit Apollo, cuius dei partes etiam graviores hoc sunt quam priore libro. Humana ille specie indutus accurrit ad Hectorem, quem a curru frustra insequendo revocat. Audita Euphorbi nece revolat ille v. 87 seq. jamque inter Trojanorum propugnatores apparet Menelao occurrens. Qui clamore ejus terribili auditu imparem se unum esse videns tot tantisque viris, jam appropinquante hostium acie v. 108—113 aegre et invitus recedit. At qui poterat solus esse? nonne Myrmidones certe prope stabant, eo usque victores? Sed fieri potest, ut aut longo spatio ante ceteros omnes Patroclus antecurrerit, aut ne cum eorum quidem auxilio Hectori Trojanisque Menelaus obviam ire audeat, quamquam neque animus eum deficit et v. 94 et 95 dilucide unus ille Trojanis et Hectori opponitur. — Utut vero haec res se habet, confert se Menelaus ad Ajacem, cum illo (v. 104) vel deo se resistere posse confidens. Reperit eum in sinistra aciei parte socios, quibus ingentem Apollo pavorem injecerat, hortantem ad pugnamque incitantem. Nimirum tam procul Ajacem esse, ut nondum quicquam de Patrocli nece audierit, quum ex v. 123 et brevi Menelai narratione eluceat, tum vel inde conjici potest, quod socii ejus non mortuo Patroclo, sed ab Apolline perterriti esse dicuntur. Offendit autem in narratione ea, quod Hectorem armis Patrocli jam potitum esse Menelaus dicit, quae occupatus infecta re paulo ante Euphorbus ceciderat. Si quis conjecterit, interjecto temporis spatio Hectorem illa occupasse, eodem certe tempore corpus potuit Patrocli abripere; quod tuendum esse et servandum dicit Menelaus. Sed in medio hanc rem relinquo postea explicandam, quoniam arcte cohaeret cum aliis quibusdam difficultatibus, quae ante tollenda sunt.

Dum Ajax et Menelaus cum ceteris Achivis appropinquant, Hector praecidere Patrocli caput corpusque Trojam trahere conatur; sed conspecto Ajace desistit ab incepto et comitibus in urbem arma deferre jussis ipse in aciem recedit, ita ut nullo negotio Ajax corpore potiatur et scutum suum pro illo quasi propugnaculum constituat. Dispicet hoc quoque loco, quod moratur Hector, dum illi adveniunt. Cur tandem arma Apollinis ictu partim detracta partim soluta non celerrime arripuit et cum corpore abiit? Longum profecto iter Menelao faciendum erat, praesertim qui initio nesciret, ubi Ajax versaretur. Sed de hujus quoque loci medicina v. infra.

Achivorum interventu tantus Hectorem terror invaserat, ut nova Glauci adhortatione opus esset momentis, ut Patrocli corpus occuparet ad Sarpedonem eo pretio redimendum. Quo loco possis pro documento uti, non in Lyciam supra Sarpedonem ab Apolline deportatum esse, sed in Achivorum manus incidisse; scio autem, saepe deorum facta ignorari a mortalibus. — Commotus Glauci vituperatione Hector ad ministros, quibus arma Achillis Trojanam auferenda tradiderat, accurrit, et ipse illius armis induitus sua pro illis in urbem mittit. Quo facto ad Trojanos reversus ad corpus occupandum instruit proelium. Etiam hoc loco vix videtur comprobari posse, tanto praetermisso tempore, dum increpatur a Glauco, proficiscitur ad ministros, qui non procul quidem, aliquantum tamen progressi esse v. 190 dicuntur, induit arma, aciem instituit Trojanorum, quos singulis verbis singulos cohortatur, Ajacem nondum et Menelaum in tutum receptaculum corpus detulisse aut ad Achillis tentorium misisse. Neque minus hoc ipsum mirum est, quod Hector, quae vixdum in urbem ferri arma jusserset, paulo post suis illorum loco remissis ipse induit. Nulla omnino mutandi consilii in tantis tem-

porum rerumque angustiis causa videtur fuisse neque opportunitas; imo vero id si fecerit Hector, merito in vanitatis crimen inciderit, quod illi objecit scholion B:

ἀντίθεσ τῷ καὶ τὸν Μενέλαον · δι μὲν ἀναχωρεῖ συμμαχίαν προσκαλεσόμενος · δι δὲ οὐδὲ θνητούς τοὺς φίλους, ἀλλ᾽ ἵνα κορμήσηται τοῖς ὅπλοις ὥσπερ μειόσιον ἐπὶ στολῇ αὐχοῦ.

Quae cum iis, quae supra offendebant, quum conjungerem, consiteor non mediocriter me esse commotum neque multum afuisse, quin v. 130 — 131 totumque locum a v. 140 — 214 ejiciendos esse putarem. Videbatur haec narratio ab eodem interpolatore exorta esse, qui in libro XVI Glauci sanationem intexuisset, ita quidem, ut imitaretur Hectoris per eundem Glauicum lib. XVI v. 538 seq. et per Apollinem lib. XVII adhortationem. Nimirum sublati illis non ultima solum, sed superioribus quoque offensionibus optime omnia videbantur quadrare: Hector ab Apolline incitatus, ut discederet ab equis Achillis frustra persecundis, Menelaum a Sarpedonis corpore repellit, sed vanitate quadam commotus armis induendis tempus ad deportandum corpus datum frusta terit, dum Ajax ejusque socii adveniunt. Itaque appropinquantibus illis retro cedere cogitur, non fugam capturus, sed ceteros socios advocaturus, quibus adjunctis v. 233 denuo Ajacem et Menelaum aggreditur, ita ut Ajax, imparem se esse tanto hostium numero intelligens, quum ipse ad tuendum corpus remaneat, Menelaum mittat, qui Danaorum duos, quam celerrime ut auxilium ferant, compellat; quo facto jam par aequumque utrumque proelium committitur a v. 262.

At altera et meliore cura hunc locum retractantibus recedendum esse a tali opinione visum est et condonandum poetae, epico praesertim, si quando neglecta paulisper justa temporis ratione, quae parum congruerent, admitteret, dummodo res ipsae essent probabiles neve ab omni carminis argumento abhorrerent. Multa insunt etiam in hac carminis parte perquam pulera et quae mirum in modum metu et miseratione compleant animos; in quibus v. 198 — 208 pono, ubi miseret deum supremum tanti herois tunc quidem laete et superbe incidentis, neque quam prope ipsi mors acerbissima immineat, divinantis. Itaque intactum locum totum relinquimus pro documento tantum esse existimantes, multo etiam plura et majora, si quis voluerit, in dubitationem posse adduci.

Jam vero omnibus utrumque paratis ipsius inde a v. 262 certaminis initium divina quadam arte describitur. Ibi primo v. 268—270 tenebrarum mentio fit, de quibus v. s., neque vero, ut aliis locis, pandunt illae ad Achivorum perniciem, sed ad corpus Patrocli tuendum, quod ne praeda fiat canum Trojanarum, prouidet Juppiter. Ubi v. 273 mihi suspectus est, primo quidem propter vocem Τρωγῆσιν, quae ad δηλῶν et κνοῖ addita plane supervacanea est; tum vero ne sententia quidem loci ita bene se habet: caligine, dicit poeta, Juppiter pugnantes omnes obtextit, ne miserum corpus praeda fieret canum; quare etiam socios ad tutandum eum compulit. At non Juppiter, sed Menelaus nullo Jovis impulsu id fecerat; imo vero Apollo, qui omnem patris voluntatem perficit mandataque persecutur, Hectorem ad rapiendum corpus incitaverat. Neque vero, etiamsi suo consilio Juppiter Achivos incitasset, tam breviter poterant talia consilia commemorari, quae alias etiam factis significari solent. Denique omnis ista conclusio parum logice videtur dicta esse, cuius loco expectaveris: „itaque tenellas illas effudit“ aut aliquid simile.

Commisso proelio primo quidem a v. 274 Trojani Achivos superant, sed non multo post collectis illi animis subsistunt Ajace auctore, qui invicem Trojanos jam ad urbem Patroclum tracturos repellit. Excipiunt, ut plerumque fit, certamina singularia a v. 288—315, quibus Ajax potissimum et Hector, utriusque aciei duces, excellunt, Menelaus autem multo iis inferior existit et sub finem demum totius carminis novam operam suam interponit. Trojanis v. 315 plane propulsatis, jam adverso Jovis consilio, qui hic quoque adversarius iis putatur, victores evasissent Achivi, nisi iterum intercederet Apollo: is Aenean hortatur, qui cognito sub humana specie deo suos, ut fortiter resistant, impellit. Ita restituto proelio nova oriuntur certamina singularia et denuo describitur Achivorum acies v. 354—370, simillime superiori v. 267, sed etiam pulcrius et tanto discrimini convenienter.

Eo usque bene pugna sibique constanter procedit: multi ab utraque parte cadunt, pauciores tamen Achivi, qui prudenti Ajacis imperio usi inter se mutuo opitulantur. Itaque finem mox fore certaminis expectamus, neque vero, quum Achivi etsi ancipiti Marte inferiores tamen sint pugna, effici ille nisi deorum interventu potest. Sed frustra; v. 593 demum aegidem Juppiter concutit, nubibus Idam circumvolvit, tonitrua

et fulgura spargit, Achivis terrorem fugamque immittit. Contra inde a v. 370 usque ad v. 593 multa in variis campi partibus certamina describuntur, in quibus nullus fere ordo observatur quaeque magnam partem ejusdem rei repetitionem offerre videntur.

Primo quidem v. 370 in reliquam campi partem claro coelo collustratam oculi nostri vertuntur. Excellunt ibi ante ceteros Nestoris filii duo, Antilochus et Thrasymedes, qui nondum quicquam de Patrocli caede certi compererunt, sed eum etiam tum in acie prima versari putant. Quos versus 370—383 satis manifestum est arctissime cohaerere cum v. 681 seq., ubi Menelaus Antilochum narratur quaerere, quem ad Achillem nuntium mittat. Habet autem locus ille multum offensionis, quoniam accuratius de Nestoris filiis nihil, sed praeter poetae consuetudinem hoc modo traditur, quod melius erat usque ad v. 681 reservari, ubi non solum in totum carminis contextum illi recipiuntur, sed etiam in sinistra acie eos versari (quamquam unius Antilochi ibi fit mentio) cognoscimus. Neo vero v. 381 omnino cum antecedentibus congruit. Mors enim et fuga sociorum commemoratur. At quorum sociorum? Eorum, qui sub claro coelo pugnant una cum Nestoris filiis? At iidem v. 373 seq. dicuntur procul ab hostibus stantes quiescere et vitare tela utrumque emissae; qui igitur possunt fugere et perire? An eorum, qui de corpore pugnant cum Ajace et Menelao? At iidem v. 363 dicuntur non incolumes quidem stare, pauciores tamen quam Trojani cadere; necdum iidem fugiunt, sed (cf. v. 319 seq.) tanto superiores sunt, ut Apollinis opus fuerit auxilio. Plane ab eo differt v. 681, nam ibi revera fuga exorta est (cf. v. 597). Etiam hoo mirum est, quod duo tantum viri Patrocli caudem ignorare dicuntur; neque enim omnis sinistra acies nec Nestor vel ceteri heroes, qui vulneribus fessi in castris remanserant, neque ipse Achilles quicquam de illius interitu audiverant. Denique etiam hoc offendit, quod laevae aciei descriptio insertis v. 375—377 ita dirimitur, ut redeat poeta ad defensores Patrocli, de quibus et ipsis nihil novi comperimus, nisi quod laborare tenebris et proelio terique gladiis denuo narrantur. Facile igitur conjecteris, versus illos insitios esse, et v. 377 δύο δ' οὐ πω γάτε πεπίσθην continuo applicandum ad v. 375 πολλὸν ἀγρεσταότες. At ne ita quidem bene narratio progreditur, quoniam, ut supra vidimus, omnis hic locus parum accommodatus est. Quem ad sanandum mihi quidem nihil videtur reliquum esse, nisi ut aut hoc tantum poetam dicere voluisse existimemus, reliquum campum clara luce illustratum fuisse, quo magis, quantum in altera parte discrimin esset, ostenderetur, aut totum locum supervacaneum esse atque inutilem. Delendi igitur sunt aut omnes v. 370—383 aut certe 377—383 reservatis 370—376, ita ut v. 376 τείχοντο δὲ νηλέι χαλκῷ hujus narrationis finem faciat. Quae opinio vel eo videtur comprobari, quod v. 377 ὥσσοι ἄριστοι ἔσαν aperte respicitur ad v. 368 μάχης ἐπὶ θόσον ἄριστοι, ita ut in sequentibus versibus repetitio tantum prioris partis paulo accurasier insit.

Redit poeta v. 384—399 ad Patrocli corpus, sed ne hic quidem producitur narratio, sed pulcherrima tantum a v. 389—399 similitudine pugnantium animi comparantur cum viris, qui bovis cutem in omnes partes distrahere et extendere conantur. Occurrit hic v. 384 illud τοῖς δὲ πανηγερίοις, quod jam Lachmannus reprehendit. Quo enim jure dieuntur per totum diem pugnasse, quum sub vesperum occidisse Patroclum constet? Nec minus mirum est atque molestum, quod tertio intra paulo plus centum versus eadem pugnantium contentio describitur, primo 267, tum 354, denique 384. Talem ejusdem pugnae ter repetitam descriptionem languidi habere aliquid, quis non videt? Mihi quidem non est dubium, quin certissima haec sit interpolatio, imitatio primae pugnae, sine firmo ordine certaminibus quibusdam aliis et colloquiis variata et intermixta. Jam ipsa Aeneae cohortatio per Apollinem (v. 322), Hectoris per Aenean simili quadam ratione fiunt, ac v. 439 idem heros a Glauco, v. 71 ab Apolline admonetur. Sed ut contenti simus eo, quod maxime necessarium est, v. tantum 384—388 delemus reservata pulchra illa similitudine v. 389—399. Quo facto, quum et ipsi v. 377—383 supra ejecti sint, v. 389 applicandus est ad v. 376:

376. — τείχοντο δὲ νηλέι χαλκῷ.

389. ὡς δ' ὅτι ἀνήρ ταῦτοι βούς μεγάλοιο βοείνη — —

Et si quis alteram, quam ego proposueram, opinionem sequi malit, non minus apte ejectis etiam v. 370—376 cum v. 369

ἔστασαν ἀριγὶ Μενουπάδῃ καιατεθνῆσαν.

v. 389 conjunget. Utrum aptius et melius sit, difficile est discernere; nam haec altera quoque conjectura eo sustentatur, quod v. 368 et 369 cum v. 376 adeo congruunt, ut hunc ex illis sumtum esse paene invitum judicare cogamus.

Nequē vero a v. 400 procedit proelium, sed iterum in graves errores et dubitationes magnas abducimur. Primo enim transit poeta ad Achillem, quem, ut par erat, omnino pugnae ignarum facit. At dubito, num quis hoc loco Achillis commemorationem exspectaverit. Dixerit forsitan aliquis, venuste et eleganter hic continuum certaminum atrocissimorum tenorem interrumpi; at hoc si vellet poeta, diutius profecto in eo commorari debebat neque, ut hic factum est, leviter tantum attingere herois inertiam, quae laborantibus ceteris nescio quid habet injucundi atque molesti. Maximam vero dubitationem movent v. 406—409, quibus nec sine suo auxilio neque cum sua ope Patroclum Trojam deletur esse exspectasse Achilles narratur, quippe cui saepe occultum Jovis consilium clam reliquis (*νόστητον ἀχαιῶν*) mater patefecerit. Quid sibi ista volunt? Si sciret Achilles Patroclum ne secum quidem conjunctum Trojam capturum esse, nonne divinare debebat certissime, Patroclo ante se moriendum esse? Totum hunc locum cf. cum lib. XVIII v. 9 seq. Ibi enim revera vaticinium quoddam Thetidis offertur, sed aliud et aptius. Nam quum belli tumultu propius accedente mortem jam Patrocli praesagiat animo, meminit Achilles quondam sibi nec vero saepe, ut nostro loco, praedixisse matrem, vivo ipso Myrmidonum optimum mortem esse occubiturum. Quod oraculum quo accommodatus illo loco est, eo minus hic nōstrum ferri potest.

Ab Achillis tentorio ad Patrocli corpus revertitur. Ubi v. 412 — 425 quarto jam eadem ejusdem aciei descriptio offertur. Quid difficilius, quid molestius, quid minus ferendum in tam praeclaro carmine? Quare nihil dubito etiam hanc descriptionem ex nostra Patroclea resecare. Inest in illis versibus etiam singularē aliquid, quod quum alii loco repugnet, opinionem nostram confirmet. V. enim 397 recte et bene Achivi corpus se ad naves ablatores esse speraverant; v. 416 dedecori iidem sibi fore existimant, si revertantur ad easdem illas naves. Addunt quidem, melius sibi esse futurum a terra abripī, si in urbem Trojanos trahere corpus patientur; neque vero inde consequitur, malle eos in campo consistere, quam servato corpore ad naves recedere. Itaque v. 370—425 paucis modo, quos supra indicavi, exceptis plerique mihi suspecti sunt et ita quidem suspecti, ut qua ratione cum carmine primario conjungi possint, non videam.

Idem fere nec tamen plane idem Lachmannus judicat, v. 366—423 omnes delendos esse censens<sup>23)</sup>), in quibus multa videtur sibi reperisse ex aliis carminibus sumta et parum hic convenientia. Neque vero omnia mihi ejus argumenta satis faciunt. Nam, ut exemplum afferam, cur fieri non potuerit, ut v. 404 sub Trojae moenibus Patroclus cecidisse diceretur, non video; sed eadem est illa quæstio, cur ad lib. XVI v. 698 seq. factum esse Lachmannus neget, ut moenia Patroclus aggredieretur. Imo vero extra fossam occisum esse Patroclum luculentum est, atque adeo ad tantam temeritatem propelli eum necesse videtur, quo et evidentius „ἄτη“ ista ejus appareat et difficilius postea sit certiore Achillem fieri et vehementior de corpore ejus pugna confluet.

Nova inde excipit digressio paulo uberior latiusque patens quam priores, inde a v. 426—542, quam ego, quamvis pulera sit maximam partem et egregia, ab ipso tamen Patrocleae poeta ortam esse persuadere mihi non possum; tot insunt, si accuratius eam excutiamus, tantaeque difficultates. Res ipsa ita est: Automedon, Patrocli auriga, equos e loco agere non potest, quamvis multum eos flagello, multum precibus, multum conviciis maledictisque stimulet; lacrymas fundunt de mortuo domino, capita humi demittunt, jubas ad terram diffusas pulvere polluant. Quos miseratus Juppiter recenti robore confirmare decernit, ut Automedonem quidem currumque Achilleum ad naves e proelio ducant, quamquam victoram Trojanis gloriamque vult concedere, dum ad naves advenerint, sol occiderit, nox esse coepit.<sup>24)</sup> Refectis illi viribus pulverem ex jubis excutiunt celeriterque currum non, ut Jovis consilium fuerat, ad Achillem, sed per medias Trojanorum et Achivorum acies abripiunt. Quibus huc illuc vectus modo invadit Automedon in hostes modo ex proelio a fugit, nec vero quemquam occidit, quoniam non potest unus pugnare et currum dirigere equosque inhibere.

In quanam igitur campi parte ea accident? apud corpus, ubi utriusque exercitus fortissimi laborant, an in sinistra, ubi ceteri magno inter se spatio relicto lente cauteque dimicant? Apud corpus si versaretur, non poterat ille tam longe lateque circumvehi, ubi nec locus sufficiebat et ceteri heroes pedibus rem gerunt;

23) Lachmann *Betrachtungen* pag. 75 et 76.

24) Cf. v. 455. Etiam hoc loco nondum sol occidit, id quod bene congruit cum reliquis carminis partibus, de quibus v. s.

relinquendus certe currus erat. Praeterea a corpore Automedontem cum equis Achilleis aufugisse in lib. XVI fine et XVII initio, ubi Hector eos insectatur, apertissimum est. Versatur igitur sine dubio in sinistra parte, id quod vel ex v. 483 colligi licet, ubi conspectum illum Hector cum Aenea aggredi curruque spoliare constituit.

Ita enim dum inter utramque vehitur aciem, incidit ille in Alcimedontem, unum ex quinque Myrmidonum ducibus,<sup>25)</sup> et ipsum temere vagantem. Qui acceptis habenis currum regit Automedonte, ut pugnam imeat, desiliente. At quid hoc est? Alcimedon, quem et ipsum in sinistra parte esse certo concludimus, v. 471 criminis veritatem Automedonti, quod occiso Patroclo prima in acie πρώτῳ ἐν δύολῳ pugnet. Quod si, ut aequum est, uterque compertam mortem Patrocli habet, qui fieri potest, ut ceteri Achivi in eadem parte pugnantantes tantae calamitatis ignari sint? Atque ubi tandem Myrmidores sunt? utrum et illi de Patrocli corpore pugnant solique inde recesserunt duces fortissimi? an ex terrore, qui occiso heroe mentes eorum occupaverat, nondum se recreasse cogitandi sunt? Graves sane quaestiones, quae certo solvi vix possunt, quippe quum omnino Patroclo mortuo nulla fiat Myrmidonum mentio.

At omissis illis ad cetera pergimus: Hector conspectis, ut supra demonstratum est, equis cum Aenea accurrit, tantam se praedam arripere posse confidens, una cum illis proficiscentibus Chromio et Areto. Quibus cognitis Automedon Jovem, ut se adjuvet, precatur, Alcimedonte, ne ab equis separarentur, prope subsistere jussso Ajaces et Menelaum, ut auxilium sibi ferant, advocat. Nempe tam prope illi adstant, ut exaudire ejus vocem possint. Tum hasta emissa occidit Aretem. Hector ad ulciscendum comitem in Automedontem jaculatus declinante illo aberrat a proposito, ita ut super eum hasta volet humique figatur. Quo facto jam ad gladios ventum est, quum Ajaces advolant, quos verili Hector, Aeneas, Chromius relicto Areto recedunt. Spoliato illo paulum quidem liberasse se animum a moerore, quamquam deteriorem occiderit, gloriatu currum concendet Automedon, manibus pedibusque sanguine cruentatis leoni similis, qui bovem devoravit. Ubi in v. 538, quod videam, „δλίγον περ“ non recte intellectum est ab interpretibus. Quod Nitzschius p. 176 „pauisper“ interpretatur, μεθέγκα paraphrasta per intransitivam elocutionem dictum putat. Evidem totum versum sic intelligo: „paululum quidem liberavi animum (removi a) dolore de Patroclo concepto, i. e. paulo levior dolor meus factus est, quoniam, quamvis detiore viro interfecto (χερσίνα περ καταπέφυση), mortem amici ultus sum.“

Finita v. 542 digressione nostra quinto jam ad Patrocli corpus revertimur, apud quod eosdem, qui antea pugnaverant, reperimus, quamquam redisse Hectorem cum comitibus nusquam luculenter dictum est; nam v. 533 universa modo illorum fuga significatur:

τοὺς ὑποιαζόσαντες ἔχωρους πάλιν αὖτις,  
de Ajacium autem reditu plane silet poeta.

Omnis vero illa digressio vehementer a ceteris Patrocleae partibus discrepat. Ac de nonnullis quidem discrepantiis jam supra exposui; sed accidunt aliae et graviores. Narrari quidem, quae currui Achilleo acciderint, nihil miri est; sed id jam factum est in fine lib. XVI et initio lib. XVII. Quo si respexeris, illico exspectaveris interfecto Patroclo ad Achillem se collaturum Automedontem et, quae evenerint, narraturum. Quis enim eo aptior, qui rem tam atrocem perforat? Sed abhorruisse id a poetae consilio posthac videmus. Ita enim erat propositum, ut aliquis Automedonte etiam carior Achilli ingratum illud legationis onus susiperet, ut amicus amicum de tristi amici fortuna certiorem faceret. Neque offendit, quod Automedon primum se irae Achillis offerre dubitans remanet in proelio, quum praesertim sua fuga Myrmidonum pavorem auctum iri suspicetur; ulcisci denique ipse studet Patroclum, ut et se ipse consoletur et quo majore fiducia in Achillis conspectum prodire possit. Haec et similia ad tuendam nostram digressionem facile afferri possunt. At nonne maxime offendit, quod bis Hector simili plane ratione eosdem equos persecuti narratur et bis spe proposita decipi? Mihi quidem videtur hic locus ex superiori narratione in fine lib. XVI et initio XVII tradita repetitus esse a poeta nobili quodam et ingenioso, addita pulchra illa de flentibus equis immortalibus descriptione, ut recreatio quaedam et refectio animi fieret ab atrocissimo certamine.

25) Cf. XVI, 197.

Ceterum ne locus quidem ipse, cui haec narratio insereretur, bene apteque delectus est. Trojanos enim et Achivos acerrime de corpore pugnantes vidimus: tamen Hector, quid desertis suis eventurum sit, nihil curans, acsi nullum rerum discrimen sit, nulla necessitate coactus cum Aenea et aliis duobus post se fortissimis viris abit fortunam periclitatus, quamquam jam supra v. 75 ab Apolline edoctus est, „ἀξίχνια“ se persequi, quoniam currus ille a nemine mortali dirigi possit. Quanta igitur in eo animi levitas fuisse existimanda est, quanta stultitia, qui nihilo minus laborantes suos desereret, praesertim quum non jam temere vagari equos, sed ab Alcimedonte regi cognosceret. Parum profecto convenit hoc prudenti Hectoris et prae-cauto animo. Etiamsi vero, ut supra Achillis armis se ornaverit, ita vana gloriae cupiditate et spe immortalium equorum potiundorum iterum abreptum esse Hectorem concedamus, qui tandem Aenean eum secutum fuisse probari poterit? nonne Glaucus, qui alias etiam immerito illum vituperat, summo jure temeritatis vanitatisque crima in eum conjecerit!

Conferas, quo melius id eluceat, v. 656 seq., ubi non ad inanis gloriae umbram consectandam, sed ad Antilochum quaerendum, socios suos Menelaus paulisper relinquit. Quam caute, quam cunctanter ab illis recedit! Ut leo ab aula telis facibusque ardentibus coactus, postquam diu virorum et canum impetum frustra sustinuit, sic ille aegre tandem repellitur indignabundo et irritato animo: timebat enim remoto se ne laborantes Achivi et in fugam conversi praedam hostibus corpus relinquenter. Quare priusquam abiret, multa Ajacibus et Merioni mandat: memores essent miseri Patrocli, qui, quamdui viveret, omnibus tam benevolum se praestitisset et pro ipsorum salute mortuus esset. Idem perfectis mandatis, quamvis misereret eum laborantium post Antilochi discessum Pyliorum, nulla tamen mora interposita v. 702 regreditur nihil antiquius habens, quam ut ad eam pugnam se conferret, in qua summa discriminis posita esset.

Jam vero ut miro quodam modo suos Hector deseruerat, ita v. 543 nullo fere, quo reditus ejus significaretur, verbo addito, ad illos revertitur. Qui interea a pugna requievisse putandi sunt; nam v. demum 543 recens exoritur proelium jam incitante ipsa Minerva:

ἄψ δὲπὶ Πατρόκλῳ τέτατο χρατερὴ ὑσμύνη  
ἀργαλέη πολύδαχωνς, ἔγειρε δὲ νεῖκος Ἀθῆνη.

Itaque quum neque initium neque finis neque universa ipsa narratio cum ceteris carminis partibus neque antecedentibus neque sequentibus recte cohaereant, equidem totam istam digressionem a primario Patrocleae contextu secernere non dubito.

Sed reciso toto illo loco novis deinceps difficultatibus implicamur. Minerva enim v. 544 seq. de coelo venit, ut proelio intersit, neque vero, ut alias saepe, clam Jove a Junone, sed ab ipso patre missa, cujus mens jam conversa esse dicitur. Itaque adventus ejus non in occulto fit, sed v. 547—552 magnifico naturae portento indicatur, ut omnes propinquum esse divinum auxilium agnoscant. Confirmantur quum omnium Achivorum animi, tum Menelaus a dea, quae Phoenicis speciem induerat, ad pugnam incitatus Poden interficit, carissimum Hectori e plebe socium. Quo casu adeo torrentur hostes, ut ipsum Hectorem nova Apollinis eaque ultima adhortatione confirmari oporteat.

At omnis ea narratio hic importuna et molesta est. Quid enim sibi vult Minerva? quae nihil perficit praeter Podis necem, cujus mors, ut posthac liquet, nullius momenti est, quum Hector comperta ejus caede ira et dolore incensus confessim ad proelium redeat. Nec vero postea quicquam Minerva efficit, sed plane recedere e proelio videtur. Jam vero quo ipse consilio Juppiter Minervam misit? Quum Minerva in medium procedat, fieri non potest, quin Achivis bonam ferat fortunam; ergo quum Juppiter eam dimittat, certo Achivos vult per eam servari aut superiores discedere. At hoc loco quum conversum Jovis consilium dicatur, num quis, qui non praeceptis teneatur opinionibus, aliud quicquam intelliget, nisi constituisse Jovem, ut Achivi, qui eo usque Trojanorum impetum fortiter sustinerent, in fugam conjicerentur? Tamen id si vellet Juppiter, cui eae partes minus convenienter quam Minervae, Achivorum adjutrici? Etiamsi, id quod nonnullos velle video, consilium Jovis esset, ut servato corpore fugerent Achivi, eamque ob causam missa esset Minerva, nonne magis deceret tantam deam, Patroclum ex' proelio eripere nube tectum suisque tradere? quod alias saepius fit in Iliade, ut quos ament dii et tueri velint, eos ex hostium conspectu removeant.<sup>26)</sup> Quorum hic nihil fit, quin

26) Cf. Parim a Venere III, 380, Aenean a Neptuno XX, 225 sublatum.

etiam ne animorum quidem ista confirmatio ullius momenti est, quippe qui paulo post ab Hectore ab ipsoque Jove novo terrore afficiantur. Nec minus deae cum Menelao colloquium perversum et ineptum videtur. „Tibi, inquit illa, perpetuo dedecori et ignominiae erit, si canes fortis Achillis socium sub Trojae moenibus dilacerent.“ Cui Menelaus respondet: „Si Minerva me adjuvaret telaque a me arceret, libenter ego subirem periculum; sed in Hectore saevus inest incendi impetus, nec finem facit necandi, cui Juppiter gloriam suppeditet.“ Quorsus illa? Ubi tam immanem terribilemque se praestitit Hector, qui summa vi Achivos a corpore propulsare non potuit? qui, si digressionem antecedentem genuinam esse contenderis, etiam ab Achilleo curru sine pugna ab Ajacibus foeda fuga repulsus est? Quod Patroclum occidit, nihil est; nam idcirco non timeri illum ab Achivis, imo vero vix interfectorum Patrocli haberis, supra vidimus. Contra ex Minervae criminazione timidoque Menelai responso facile in eo esse conjecteris, ut corpore potiantur hostes; sed id neque cum prioribus neque cum sequentibus concinit. Nam et ipsum Hectorem veluti timidum et ignavum alloquitur Apollo, fugisse eum vel Menelaum, inertem pugnatorem dicens. Ubi tandem Menelaum fugisse ille narratur? Etiamsi vero *κατὰ τὸ σιωπόμενον* id intelligendum esse putaveris Pode imperfecto, qui tandem cecidisse Poden ignorat? quod factum esse per Apollinem demum comperit. Nullam omnino Hectoris fugam agnoscimus, praeterquam quod a curru Achilleo non per Menelaum, sed per Ajaces propulsus erat. Ita ne id quidem ferri potest. Quare non dubito, quin et Minervae et Apollinis adventus v. 543—592 tollendus sit; nam ne Apollo quidem ad finem rem perducit, sed ipse Juppiter v. 593 magnifica, ut ingenti certaminis aptissimum est, ratione concussa terra coeloque ad fugam Achivos convertit. Ceterum quam perverse v. 545 et 546 Minerva se proelio immisceat, jam Lachmannus vidit<sup>27)</sup>; sed non sufficit tantum deleri, quantum ille voluit.

Ita omnia fere a v. 377 — 592 subditiva esse judicamus. Inde vero quasi terra ex tot tantisque fluctibus reperta optime pleraque procedunt et pauca tantum usque ad finem hujus libri relinquuntur, quae in dubitationem vocari debeant. V. 399 ultraque acies ita descripta erat, ut neutri cederent, neutri superiores essent, id quod pulcherrima illa imagine v. 389 — 399 luculentissime expositum erat. Cui quam bene se applicat v. 593, quo Juppiter, qui frustra consumtis omnibus pugnantium viribus unus jam certaminis solutionem afferre potest, quum caedis et anicipitis pugnae pertaesum sit, cladem Achivorum decernit. Ac primus quidem fugit Peneleos Boeotius a Polydamante vulneratus, post eum Leitos manu ab Hectore perfossa, quos tertius sequitur Idomeneus, Merionis cedens cohortationi nullam jam Achivos victoriam adepturos esse cognoscentis.<sup>28)</sup> In ea narratione hoc miror, quo modo fuga illius cogitanda sit. Si quis unum hunc locum respicit, una cum Idomeneo et ipsum Merionem fugere procul dubio existimabit. Coeranus enim, Merionis auriga et socius, cum curru ad excipiendum advolat Idomenea, qui pedibus quum se in proelium contulisset, cum Hectore jam hastam jaculato congressus in extremum mortis discrimen venturus erat. Sed non Idomenea occidit Hector, sed Coeranum, qui currum vertere vellet, jamque denuo rex in summo periculo versatur, quum subito e campo emergit Meriones, habenas ad terram delapsas comprehendit, Idomenea ut equos ad fugam impellat, hortatur. Quis igitur non una fugere putabit Merionem, qui habenas arreptas non Idomeneo tradiderit? Etiamsi vero quis facile id mente posse suppleri contenderit, tamen mirum est, quod, Idomeneus quidem cur fugiat, in promptu habet Meriones, sibi non habet; quamquam ne vulneratus quidem ille est. — Sed si finem hujus libri respiciimus, remansisse videmus in proelio Merionem, qui v. 717 et 722 una cum Menelao nominatur; nam hi ambo corpus ex proelio auferunt, dum Ajaces aggredientes hostes defendere conantur.

Insunt etiam aliae nonnullae difficultates, quae hanc narrationem suspectam reddere possint, quamquam non insuperabiles illas esse facile concedo. V. enim 609, quum ceteri heroes sine curru pugnant, Idomeneus insistere in curru dicitur.<sup>29)</sup> Quod quomodo factum sit, v. 612—616 longa interclusionis ambage explicatur, sed ea, quam et ipsam multum molestiae habere vix quisquam negaverit. Sed ut ipsa recte se habeat: tamen secundum eam Coeranus, qui Idomenea periclitantem videt, curru advenit, eum excipit, eripit certissimae neci; neque igitur, ut ex voce *ἔγεσιαστος* videatur concludendum esse, stabat in curru rex, sed ascendit hoc

27) Cf. Betrachtungen p. 78.

28) Nominatur in pugnantium numero Idomeneus cum Merione v. 258 et 259; *idem* lib. XVI v. 345.

29) Cf. Lachmann, Betrachtungen p. 78.

ipso punto temporis. Una, quae sufficiat, explicatio erit haec: Idomeneus frustra in Hectorem jaculatus celester insilit in Merionis currum peropportune a Coerano advectum; ita non conversum illum Hector, sed aurigam oblique currum devecturum attingit. Quo facto Meriones habens comprehensas Idomeneo tradit, utque fugiat, eum cohortatur. Tamen totus mihi quidem displicet locus: vix enim crediderim, tantum heroem in tam misera conditione fugere maluisse poetam quam facere aliquid memoria dignum.

Sed parva videri potest ista difficultas, si comparetur cum iis, quas jam superavimus. Transeamus igitur ad reliqua: v. 626 Ajax et Menelaus, etiamtunc fortissimi Patrocli propugnatores, jam adversari sibi Jovem et irasci cognoscunt; quod mire Ajax non ex fulminibus ab illo jactatis neque ex fuga Boeotiorum Idomeneique concludit, sed ex causa multo sane leviore, quod Trojanorum quidem, sive a forti sive ab ignavo viro missum sit, telum nullum frustra jaciatur, ipsorum autem omnia incassum cadant. Pergit admonere Ajax suos, ut ex turba conentur corpus eripere et se ipsos servare. Itaque quod servantur eo modo fugientes, non, ut nonnulli putant,<sup>30)</sup> bona Jovis voluntate fit et propitia, sed ipsa ejus ira, qua tantum illis parcitur, ut non plane pereant. — Cupit praeterea Ajax, ut habeat, quem ad Achillem mittat: neque vero se cognoscere quemquam ad talem legationem idoneum, quoniam atra omnes obtegantur caligine. Precatur denique Jovem, ut paululum eas tenebras removeat, ut, quando pereundum sit, in luce tamen perire liceat. Misericordia commotus quum Juppiter auditis precibus vota solverit, celeriter Menelaum, ut circumspiciat Antilochum sicubi reperire possit, adhortatur. Ille nulla mora interposita, aegre tamen multum admonitis Ajacibus et Merione, ut leo saucius ab aula proficiscitur, circumspectat per totam aciem ut aquila praedae cupida, propere Antilochum conspicatur in sinistra totius aciei parte ad pugnam suos incitantem, confestim ad eum festinat. Omnis actio simillima est v. 109 seq., ubi Ajacem idem Menelaus in eadem sinistra acie quaerebat. Atque omnes post illos, de quibus supra demonstratum est, hujus carminis excursus vix potuit fieri, ut nihil dum de Patrocli caede novisset Antilochus; contra si, ut nos fecimus, ex arctiore primarii carminis continuatione illos tollimus, optime omnia cohaerent neque prorsus mirabimur, quod non Automedon, sed Antilochus primus ad Achillem nuntius venit. Perpulcre hoc loco, ut supra Ajax, nullo responso redditio mandata Antilochus perfecturus abit: haeret vox, oculi lacrymis complentur, tamen procurrit relictis Laodoco armis equos prope coercenti.

Functus munere redit Menelaus ad pugnantes, renuntiat Ajaci, misisse quidem sese Antilochum, neque vero Achillem venturum sperare, quippe cui arma desint: itaque ipsi deliberent, qua ratione et corpus servare et perniciem instantem ipsi effugere possint. Quo facto Ajax illum et Merionem jubet tollere corpus humerisque auferre, quod ipse cum altero Ajace defensurus sit. Ea actio jam usque ad libri finem tam vegetis orationis coloribus describitur, ut inter pulcherrimas Iliadis partes haud dubie referenda sit. Conversis enim ad fugam principibus omnes jam effuse ad fossam versus fugiunt, ubi caedis omnia plena multique viri armati cadunt.

Restat, ut de initio libri XVIII v. 1—368 quid statuendum sit, exponam; quod Lachmannus ab eodem auctore ortum esse negat. Tamen si libro XVII jam finis Patrocleae esset, to tum profecto carmen parum integrum foret et deperisse aliquam ejus partem oporteret. Contra initium libri XVIII arctissime cum libro antecedenti conjunctum est neque, quo gravius offendar, equidem in eo quicquam reperio. Fateor quidem, v. 150, qui aptissimum est lib. XV, 233, parum accurate locum indicari, quum nondum ad naves et Hellespontum, sed ad fossam Achivi pervenerint. At nihil ibi puto nisi quem peterent locum, voluisse poetam indicare, non quo pervenissent, neque „νῆστος τε καὶ Ἑλλήσποντος“ necesse est pendere a „ἰχότοις“ sed a „γείροτες“, ita ut intelligatur: „Hellespontum versus fugientes“. Deinde quod Meriones et Menelaus non jam hoc libro commemorantur, sed Ajaces modo cum Hectore dimicantes, nihil miror. Illorum enim imago pulcherrima ratione supra expressa erat, quippe qui in fine libri XVII cum mulis grave quoddam onus portantibus compararentur; quid igitur denuo repetitam inani verborum pompa et specie extenuari illam sententiam attinebat? Sed urgente temporis necessitate quo suspensiores ipsi inter spem metumque tenemur, eo sapientius rem ita instituit poeta, ut ad Ajaces potissimum animi nostri converterentur. Murum denique, qui v. 215 offertur, castrensem non deesse in ceteris Patrocleae partibus, supra demonstravisse mihi video.

30) Cf. Faesum ad v. 546.

Ac venuste quidem et eleganter hujus libri initio magnam cum libro XVI similitudinem intercedere facile cognoscitur. Illic enim Hēctor usque ad naves progressus jam navem unam accensurus erat; unus Ajax impetum ejus sustinet, sed is quoque fessis jam labantibusque viribus. Ad eundem finem in libro XVIII res reducta est: iterum Trojani superiores sunt, iterum Hector Achivos premit jam ipsum Patrocli corpus occupatus, quod, ut navis supra, ab Ajace potissimum Telamonio defenditur. Denique ut illic de Achivorum laboribus Patroclus certiorem Achillem facit, ita hic Antilochus, post illum Achilli carissimus, caedem Patrocli renuntiat. Itaque pari quodam modo omnia ad unum irascentem in tentorio et otiosum Achillem spectant, in quo una salutis spes posita est; ita ut finis totius carminis optime et pulcherrime ad initium quasi redeat.

Uterque Achillis amicus advenit lacrymans tristesque in eo cogitationes movet. Quem hic videmus jam ante Antilochi adventum anxiis jactatum curis et quid acciderit amico sollicitum, reminiscentem simul veteris cuiusdam oraculi a matre accepti; jamque, quae metuit, pro certis habet reprehenditque amicum, quod male praeceptis suis obtemperaverit, quum ipse accedit dirae calamitatis nuntius crudelissimoque illum dolore afficit. Cujus querelis auditis mater ex intimo, ubi apud patrem moratur, maris sinu cum Nereidibus<sup>31)</sup> accelerat, ut quae tam acerbi sit doloris causa, praesens cognoscat. Percontanti illi multis verbis luctus causam exponit, neque jam vivere se velle confitetur, nisi ulcisci amici caedem potuerit. Querenti, quod post illum continuo ipse moriturus sit, fortiter respondet libenter se moritum esse, et jam profecturus est, quum retentum illum, arma deesse ipsi, admonet, quae jam ab Hephaesto petitura proficiscitur, admonito filio, ne prius proelio sese immiseret, quam arma accepisset.

Interea corpus Patrocli, ad quod denuo v. 148 reducimur, summo in discrimine versatur, quum Iris, ut avertat extremum periculum, clam Jove ceterisque diis a Junone missa Achillem hortatur, ut celerrime ad auxilium ferendum acceleret, excusantem, quod arma sibi desint, inermem ad fossam apparere jubet, si forte ejus aspectu perterriti desistant a proelio hostes paulumque Achivi animos recreent. Ita ipsa Minerva aegidem obtegente proficiscitur ille, ter tollit clamorem aeneae tubae similem, terrorem injicit Trojanis, Achivos ab eorum impetu liberat, ita ut corpus ex illorum manibus eruptum feretro in Achillis tentorium deportent. Occidit sol, finitur certamen v. 239—242. Excipit concio Trojanorum, in qua dis jam adversantibus Hectoris vincit consilium; deinde luctus Myrmidonum de occiso heroe, postremo Jovis Junonisque colloquium usque ad v. 368.

In universa hac extrema Patrocleae parte per pauca tantum inveniuntur, quae emendatione egeant; itaque quam brevissime potero reprehensis iis, quae minus convenient, finem faciam.

Ac primum quidem parum sibi constanter Achilles agit. Pollicetur enim matri, non se in proelium abitum esse, priusquam ab illa arma divina acceperit v. 134—137. Tali de vita sollicitudine cruciari in extrema praezerosim, qua tum affectus erat, motione animi nec decet omnino tantum heroem, qui una excepta corporis parte ne vulnerari quidem poterat, et valde abhorret a forti ejusdem responso v. 114—121 matri reddito. Porro qui fieri potuit, ut tam brevi Antilochi admonitionem, celerrime ut adveniret, cohortati oblivisceretur et sequentem diem opperiri vellet, quum ipsum Patrocli corpus ne corriperetur ab hostibus, in summo esset periculo? Ut se conferat tandem ad tuendum amicum, denuo opus est Iris impulsu; sed etiam ea v. 166 seq. eum incitante cunctanter et timide v. 188 seq. inertiam excusat, quod inermis se hostibus objecere nequeat, quae ejus dubitatio v. demum 197 seq. ab ipsa dea refellitur.

Quem locum equidem valde mihi displicere libere confiteor: multo omnia pulchiora fore judico, si auditio tristi nuntio primoque dolore suppresso confessim Achilles ad fossam properaret, ut amici corpus tueretur. Accedit, quod, quo se contulerit Antilochus, nusquam dicitur: colloquio enim Achillis cum Thetide silentem illum interfuisse mihi quidem haud sane probatur, nec minus mirum foret, si nullo dum ab Achille, quid facturus esset, responso reddito necdum sedato ingenti luctu, quo eo ille abripitur, ut sibi ipse ne manum immittat, verendum sit,<sup>32)</sup> Antilochus proficiseretur. Num igitur hic bonus dormitat Homerus? an ad aliam medicinam confugiendum erit? Evidem vix dubito, quin hoc loco quaedam delenda sint, sed quae et quanta, difficile dictu est. Atque libentissime ego omne illud Thetidis et Achillis colloquium sustulerim, quod super-

31) Quarum nomina Hesiodea potius quam Homerica ratione v. 39—49 enumerata esse, recte jam Zenodotus animadverit.

32) Cf. v. 32 seq.

vacaneum esse hoc loco et ei tantum necessarium, qui totam Iliadem inter se congruere postulet, pro certo et confessio facio. Profectio enim Thetidis ad arma a Vulcano petenda nihil ad Patrocleam pertinet, sed ad sequentem modo ὅπλονοιαν. At si cui audacior haec opinio videatur et nimis temeraria, is hoc fortasse concedet, eam colloquii partem corruptam esse, qua Achillem mater hoc die pugnare vetat.

EIAM minus Iris legatio videtur ferenda esse, cui aliae quoque et graviores offensiones obstant. Narratur enim illa v. 168 venisse „*κρύβδα Λιός ἄλλων τε θεῶν*“, tamen vero v. 203 seq. Minerva Achillem aegide tuerit, caput ejus splendente nube circumvolvit clamantisque vocem auget v. 217—218. Quare nesciam eam legationis occultae fuisse quis credere potest? praesertim quum alias quoque omnium illa Junonis consiliorum particeps sit. Neque vero ex difficultibus expedimur, si unam ex ceterorum deorum numero Minervam Junoni conscientiam faciamus. Quodsi clam ipso Jove Achillem Minerva adjuvaret, qui tandem patris aegidem acceperat? qua paulo ante lib. XVII v. 593 seq. concussa terrorem ille Achivis fugamque injecerat. Itaque si ipse filiae Juppiter aegidem dederit, num ignarus illius consilii id fecisse putandus est? Jam vero qua tandem causa clam Jove ab Junone Irin mitti oportebat? Corpusne Patrocli ille in Hectoris manus vollebat incidere? At noluisse Jovem, Patroclum fieri praedam hostium, aperte supra dictum est lib. XVII v. 270 seq. Confer etiam lib. XVII, 545 seq., ubi e contrario Juppiter Minervam mittit „*δηρίμεναι Αραούς*“. Quamquam eum locum supra rejecimus. Neque vero quisquam merito proferet, libri XVII v. 593 Jovem victoriam Trojanis decrevisse; nam idcirco non consequitur, Patroclum in Trojanorum manus incidere illum voluisse, imo vero universi certaminis eruentissimi is demum finis est, ut tandem ex praesenti inertia Achilles excitetur. Quod cum a Jove constitutum esset, qui hic poterat idem heros in occulto ad pugnam vocari? Neque hoc quisquam jure contenderit, tantas in carminibus Homericis Junoni intercedere cum Jove controversias, ut quaecunque in Achivorum illa favorem faciat, Jovi quam maxime occultanda sint. Talis enim opinio neque hic bene se habet neque merito, quae in Junone apta sunt, eadem jam ad Minervam, dilectissimam Jovi filiam, referri possunt.

Arctissime cum iis, quae modo exposui, cohaeret v. 356—368 Jovis cum Junone colloquium, de quo jam in scholiis ad v. 356 a Zenodoro recte judicatum est. Reprehendit istic deus deam, quod tuita sit Achivos quodque Achillem, a navibus ut surgeret, excitaverit. Quam criminatem ratione satis languente et frigida defendit. Neque enim quod dicere debebat, ipsum illius fuisse respondet consilium, ut ad tutandum Patrocli corpus Achilles e navibus protraheretur, sed uxorem se et sororem Jovis, quae princeps dea appelletur, debere Trojanis sibi invisis mala moliri. Quo quid perversius respondere poterat? Ferendum fortasse foret colloquium illud, si recte ad fatum divinum respiceretur, neque injucunde ita, quae deorum consilio exorta erat Achillis ira,<sup>33)</sup> ea jam ipsorum deorum consilio finita foret. Omnia enim jam ad finem perducta sunt, quae quondam Thetidi Juppiter pollicitus erat: fusi fugatique Achivi et ad naves usque compulsi, Patroclus occisus, ipsae ne naves capiantur et incendantur, extremum periculum. Quorum in hoc colloquio nihil omnino inest. Itaque hoc quidem Junonis cum Jove colloquium insituum esse, pro certo et explorato judico; de reliquis duabus dubitationes modo meas in medium proferre volui.

Jam vero ad omnes illos locos, quos in suspicionem adduximus, respicientibus nobis mira inter plerosque similitudo quaedam videtur intercedere; nam in omnibus paene studium quoddam cognoscitur monstrosi et portentosi, ut deorum numen, etiam ubi parum necessarium sit, praesens in rebus humanis et actuosum appareat. Hujus modi sunt lib. XVI v. 432—458 colloquium Junonis cum Jove de Sarpedonis fato, v. 509—531 Glauci vulnus ab Apolline sanatum, v. 666—683 Sarpedonis corpus a Morte et Somno Apollinis jussu in Lyciam ablatum; lib. XVII v. 426—542 equi Achillis lacrymantibus et a Jove recenti robore refecti, v. 543—592 Achivi a Minerva, Trojani ab Apolline ad proelium incitati; lib. XVIII colloquia illa tria modo a me commemorata. Ante ceteros vero deos in his Patrocleae partibus Apollo videtur in summo honore esse. Itaque omnibus illis locis inter se comparatis eo adducor, ut eodem eos fonte ortos esse existimem, praesertim quum elocutio quoque in iis aliquid commune prodat, quod demonstrare non difficile quidem, sed longum hoc loco erit. Prorsus diversa est genuinarum Patrocleae partium ratio, in quibus tum demum ad deorum operam re-

33) Cf. initium Iliadis.

fugitur, ubi solvi res humanae alio nullo modo neque ad bonum finem perduci possunt. Quae quum ita sint, universam Patrocleam ex duobus potissimum carminibus magnopere inter se diversis compositam esse judico. Alterum enim carmen est primarium, cuius singulæ partes quomodo inter se cohaereant, supra ostendere conatus sum; neque recisis alterius carminis fragmentis quicquam in illo desiderari puto. Alter fons non integer ad nos pervenit, sed disjectus et dissolutus in minutæ quasdam particulas, quae jam ad adornandum alterum illud primarium carmen hic illic, sed plerumque parum commode insertæ videntur. Quas ipsas particulas colligere, ita ut et ipsæ inter se congruant, et quale universum hoc alterum carmen fuerit, demonstrare nobis quidem non licet, quum eas partes, quae cum primario carmine congruerent, jam antiquitus perisse putem; nam quum primarium carmen sine ulla dubitatione multo et arguento et sermonis ratione praestaret, factum est, ut neglectis ceteris et contemtis eae tantum alterius carminis partes a rhapsodis servarentur, quae in illo deesse viderentur. Atque propter ipsum illud, quod in secundario fonte cognoscitur, portentosi studium posteriore eum fuisse existimo, ea aetate exortum, qua despecta et relictæ prisca morum rerumque simplicitate ad deorum potius potentiam pleraque res humanae relatae fuerint.

- Ita ut brevi jam omnia conspectu complectamus, hoc carminis primarii argumentum esse puto:
- Lib. XVI v. 2—256: Achilles Patroclum mittit, auxilium Achivis laborantibus laturum; missus et profecto illo Jovem obsecrat, ut incolumem ad se amicum reducat.
  - v. 256—363. Primus Myrmidonum et Trojanorum concursus. Terrentur quidem Trojani et a navi semiusta reprimuntur, necdum plane fugiunt Hectore eliam tum Ajaci fortiter resistente.
  - v. 394—665, exceptis v. 432—458, 509—531. Pugna Myrmidonum cum Lyciis inter fossam et naves, Patrocli cum Sarpedone certamen singulare, pugna de Sarpedonis corpore. Victoria Achivorum.
  - v. 364—393. Fuga Trojanorum et Lyciorum trans fossam usque ad urbis moenia.
  - v. 698—fin. Pugna inter fossam et urbis moenia. Patroclus frustra urbem aggreditur. Hector ab Apolline ductus proelium redintegrat. Cebriones occiduntur. Certamen de ejus corpore committitur. Patroclus occiditur. Automedon cum curru Achillis aufugit.
  - Lib. XVII v. 1—376. Menelaus Euphorbum necat, Apollo Hectorem, ne frustra Achillis equos persequatur, admonet. Hector ad corpus redit. Menelaus Ajacem advocat cum sociis, qui Hectorem a corpore repellunt. Is recedens et a Glauco increpitus postquam arma Achillis induit, et ipse cum sociis ad cadaver occupandum accedit. Idem faciunt Ajax et Menelaus. Pugna committitur ancipi quidem Marte, superioribus tamen Achivis Ajacis potissimum virtute. Ceteri in sinistra parte procul stantes lente proeliantur.
  - v. 389—399. Certantium contentio cum labore comparatur hominum, qui bovis cutem extendunt.
  - v. 593—fin. Juppiter fulgure et tonitru misso terorem Achivis injicit, victoriam dat Trojanis. Antilochus ad Achillem mittitur. Patrocli corpus a Menelao et Merione portatur, ab Ajacibus defenditur. Fuga effusa et tumultaria Achivorum.
  - Lib. XVIII v. 1—353 (exceptis v. 39—49). Antilochus Achillem de Patrocli caede certiorem facit. Thetis ad consolandum filium ex mari procedit, abit ad arma a Vulcano petenda. Achilles ab Iri denuo impulsus Achivis laborantibus auxilio venit, corpus servat atque in tentorium auferendum curat. Concio Trojanorum. Luctus Achillis. Is finis est Patrocleae.
  - Disiecta autem secundarii carminis membra, quoad cognosci possunt, haecce sunt:
  - Lib. XVI v. 367—369. Hector suos ad fossam laborantes parum commode deserit.
  - v. 432—458. Colloquium Jovis cum Junone.
  - v. 509—531. Glauco vulnus ab Apolline curatur.
  - v. 666—683. Sarpedonis corpus in Lyciam transportatur.
  - v. 684—697. Aliquot viri a Patroclo occiduntur.
  - Lib. XVII v. 377—383. Antilochus et Thrasymedes nihildum de Patrocli nece compererunt.
  - v. 384—389. Achivi et Trojanæ per totum diem pugnant.
  - v. 400—411. Achilles Patrocli caedis ignarus est, sed mala mente praesagit.
  - v. 412—425. Achivi et Trojanæ inter se invicem admonent, ut fortiter resistant.
  - v. 426—542. Excursus de equis Achilleis et de Automedonte.

- v. 543—592. Achivi a Minerva, Trojani ab Apolline ad dimicandum admonentur.  
 Incerta mihi praeterea est Idomenei fuga v. 605—625.  
 Lib. XVIII v. 39—49. Nomina Nereidum.  
 v. 356—368. Jovis cum Junone colloquium, cur Achivis excitato Achille auxilium praestiterit.  
 Incerta mihi praeterea sunt universa Thetidis et Iris cum Achille colloquia, sed rem decernere non audeo.  
 Alios quosdam versiculos, ut lib. XVI v. 1, 97—100, 261, 381, 614—615, cet. ejiciendos esse supra vidimus, sed omnes eos denuo enumerari nihil attinet.